

摘藻堂四庫全書薈要

集部

欽定四庫全書薈要卷一萬九千六百十四

集部

漢魏六朝百三家集卷二十五

明 張溥 輯

魏文帝集 二

樂府

詩品云文帝詩源出於李陵頗有仲宣之體則  
所計百許篇率皆鄙質如偶語惟西北有浮雲  
十餘首殊美瞻可翫始見其工矣不然何以銓  
衡羣彥對揚厥弟者耶詩譜云自然浮俊后山  
詩話云魏文帝曰文以意為主以氣為輔以詞  
為衛子桓不足以及此其能有所傳乎藝苑卮

言云子桓小藻  
自是樂府本色

臨高臺

詩紀云此曲三段辭不相屬鵠欲南遊  
以下乃古辭飛鵠行也漢曲大略意同

臨臺行高高以軒下有水清且寒中有黃鵠往且翻行  
為臣當盡忠願令皇帝陛下三千歲宜居此宮鵠欲南  
遊雌不能隨我欲躬銜汝口噤不能開欲負之毛衣摧  
頹五里一顧六里徘徊

釣竿

崔豹古今注云釣竿者伯常子避仇河濱  
為漁者其妻思之而作也每至河側輒歌

之後司馬相如作釣竿詩  
遂傳為樂曲漢辭今亡

東越河濟水遙望大海涯釣竿何珊珊魚尾何篋篋行  
路之好者芳餌欲何為

十五

古今樂錄云十五歌文帝辭  
後改歌瑟調西山此似未全

登山而遠望谿谷多所有梗柗千餘尺衆草芝盛茂華  
葉耀人目五色難可紀雉雠山雞鳴虎嘯谷風起號罷  
當我道狂顧動牙齒

陌上桑

棄故鄉離室宅遠從軍旅萬里客披荆棘求阡陌側足

獨窘步路局，犴虎豹嗥。動雞驚禽失，羣鳴相索登南山。  
奈何蹈盤石，樹木叢生鬱。差錯寢蒿草，蔭松柏涕泣雨。  
面霑枕席伴，旅單稍稍日。零落惆悵竊，自憐相痛惜。

短歌行

古今樂錄云：王僧虔技錄曰：短歌行，仰瞻一曲。此曲聲製最美，辭不可入樂府。

仰瞻帷幕，俯察几筵。其物如故，其人不存。一解神靈倏忽，

弃我遐遷。靡瞻靡恃，泣涕連連。二解啾啾遊鹿，銜草鳴麇。

翩翩飛鳥，挾子巢棲。三解我獨孤茆，懷此百離。憂心孔疚，

莫我能知。四解人亦有言，憂令人老。嗟我白髮，生一何蚤。

五解長吟永歎懷我聖考曰仁者壽胡不是保

六解○右一曲魏晉

樂所奏○魏遺令節朔奏樂魏文製此辭自撫箏和歌歌者云貴官彈箏此也

### 猛虎行

與君媾新歡託配於二儀充列於紫微升降焉可知梧  
桐攀鳳翼雲雨散洪池

### 燕歌行

秋風蕭瑟天氣涼草木搖落露為霜

一解

羣鷓辭歸鴈南

翔念君客遊多思腸

二解

慊慊思歸戀故鄉君何淹留寄

他方

解三

賤妾煢煢守空房憂來思君不敢忘

解四

不覺淚

下霑衣裳援琴鳴絃發清商

解五

短歌微吟不能長明月

皎皎照我牀

解六

星漢西流夜未央牽牛織女遙相望爾

獨何辜限河梁

解七

○多思腸一作思斷腸右一曲晉樂所奏

同前

別日何易會日難山川悠遠路漫漫鬱陶思君未敢言  
寄聲浮雲往不還涕零雨面毀容顏誰能懷憂獨不歎  
展詩清歌聊自寬樂往哀來摧肺肝耿耿伏枕不能眠

披衣出戶步東西仰看星月觀雲閒飛鶴晨鳴聲可憐  
留連顧懷不能存

右一曲  
本辭

### 秋胡行

堯任舜禹當復何為百獸率舞鳳皇來儀得人則安失  
人則危唯賢知賢人不易知歌以詠言誠不易移鳴條  
之役萬舉必全明德通靈降福自天

汎汎綠池中有浮萍寄身流波隨風靡傾芙蓉含芳菡  
萏垂榮朝采其實夕佩其英采之遺誰所思在庭雙魚

比目鴛鴦交頸有美一人婉如清揚知音識曲善為樂

方

右曲一作浮萍篇有  
美四句又見善哉行

同前

朝與佳人期日夕殊不來嘉肴不嘗旨酒停杯寄言飛  
鳥告余不能俯折蘭英仰結桂枝佳人不在結之何為  
從爾何所之乃在大海隅靈若道言貽爾明珠企予望  
之步立躊躇佳人不來何得斯須

善哉行

上山採薇薄暮苦饑溪谷多風霜露沾衣

解一

野雉羣雊

猿猴相追還望故鄉鬱何壘壘

解二

高山有崖林木有枝

憂來無方人莫之知

解三

人生如寄多憂何為今我不樂

歲月如馳

解四

湯湯川流中有行舟隨波轉薄有似客遊

解五策我良馬被我輕裘載馳載驅聊以忘憂

六解

一作日如歲

其一作

## 其二

有美一人婉如清揚妍姿巧笑和媚心腸知音識曲善

為樂方哀絃微妙清氣含芳流鄭激楚度宮中商感心  
動耳綺麗難忘離鳥夕宿在彼中洲延頸鼓翼悲鳴相  
求眷然顧之使我心愁嗟爾昔人何以忘憂

同前

初學記載第一解  
題云於講堂作

朝日樂相樂酣飲不知醉悲絃激新聲長笛吐清氣

解一

絃歌感人腸四坐皆歡悅寥寥高堂上涼風入我室

解二

持滿如不盈有德者能卒君子多苦心所愁不但一

解三

慊慊下白屋吐握不可失衆賓飽滿歸主人苦不悉

解四

比翼翔雲漢羅者安所羈冲靜得自然榮華何足為

解五

同前

藝文類聚作  
銅雀園詩

朝遊高臺觀夕宴華池陰大酋奉甘醪狩人獻嘉禽

解一

齊倡發東舞秦箏奏西音有客從南來為我彈清琴

解二

五音紛繁會撫者激微吟淫魚乘波聽踴躍自浮沈

解三

飛鳥翻翔舞悲鳴集北林樂極哀情來寥亮摧肝心

解四

清角豈不妙德薄所不任大哉子野言弭絃且自禁

解五

右二曲魏

晉樂所奏

丹霞蔽日行

丹霞蔽日采虹垂天谷水潺潺木落翩翩孤禽失羣悲  
鳴雲間月盈則沖華不再繁古來有之嗟我何言

折楊柳行

藝文作游僊詩古  
樂府作長歌行

西山一何高高高殊無極上有兩仙僮不飲亦不食與  
我一丸藥光耀有五色

一解

服藥四五日身輕生羽翼輕

舉察浮雲倏忽行萬億流覽觀四海茫茫非所識

二解

彭

祖稱七百悠悠安可原老聃適西戎于今竟不還王喬

假虛辭赤松垂空言

三解

達人識真偽愚夫好妄傳追念

往古事憤憤千萬端百家多迂恠聖道我所觀

四解  
右一曲

魏晉樂所奏。古今詩話云相州棲霞谷喬順二子服飛龍藥十年不飢。

飲馬長城窟行

此闕  
未全

浮舟橫大江討彼犯荆虜武將齊貫鉀征人伐金鼓長  
戟十萬隊幽冀百石弩發機若雷電一發連四五

上留田行

居世一何不同上留田富人食稻與梁上留田貧子食

糟與糠上留田貧賤亦何傷上留田祿命懸在蒼天上  
留田今爾歎息將欲誰怨上留田

大牆上蒿行

古今樂錄云王僧虔技錄  
有大牆上蒿行今不歌

陽春無不長成草木羣類隨大風起零落若何翩翩中  
心獨立一何煢四時舍我驅馳今我隱約欲何為人生  
居天壤間忽如飛鳥棲枯枝我今隱約欲何為適君身  
體所服何不恣君口腹所嘗冬被貂氈溫暖夏當服綺  
羅輕涼行力自苦我將欲何為不及君少壯之時乘堅

車策肥馬良上有倉浪之天今我難得久來視下有蠕  
蠕之地今我難得久來履何不恣意遨遊從君所喜帶  
我寶劍今爾何為自低卬悲麗平壯觀白如積雪利若  
秋霜駮犀標首玉琢中央帝王所服辟除凶殃御左右  
奈何致福祥吳之辟閭越之步光楚之龍泉韓有墨陽  
苗山之鋌羊頭之鋼知名前代咸自謂麗且美曾不知  
君劍良綺難忘冠青雲之崔嵬織羅為纓飾以翠翰既  
美且輕表容儀俯仰垂光榮宋之章甫齊之高冠亦自

謂美蓋何足觀排金鋪坐玉堂風塵不起天氣清涼奏  
桓瑟舞趙倡女娥長歌聲協宮商感心動耳蕩氣回腸  
酌桂酒鱠鯉魴與佳人期為樂康前奉玉卮為我行觴  
今日樂不可忘樂未央為樂常苦遲歲月逝忽若飛何  
為自苦使我心悲

豔歌何嘗行

宋書作古辭  
樂府作文帝

何嘗快獨無憂但當飲醇酒炙肥牛

解一長兄為二千石

中兄被貂裘

解二

小弟雖無官爵鞍馬馭馭往來王侯長

者遊三解但當在王侯殿上快獨擣菹六博坐對彈碁四解

男兒居世各當努力蹶迫日暮殊不久留五解少小相觸

抵寒苦常相隨忿恚安足諍吾中道與卿共別離約身

奉事君禮節不可虧上慙倉浪之天下顧黃口小兒奈

何復老心皇皇獨悲誰能知少小下為趨曲前為豔

煌煌京洛行

古今樂錄云王僧虔技錄云煌煌京洛行歌文帝園桃一篇樂府解

題云晉樂奏文帝天園桃

天天園桃無子空長虛美難假偏輪不行一解淮陰五刑

鳥盡弓藏保身全名獨有子房大憤不收褒衣無帶多

言寡誠祇令事敗

解二

蘇秦之說六國以亾傾側賣主車

裂固當賢矣陳軫忠而有謀楚懷不從禍卒不救

解三

禍

夫吳起智小謀大西河何健伏尸何劣

解四

嗟彼郭生古

之雅人智矣燕昭可謂得臣我我仲連齊之高士北辭

千金東蹈滄海

解五

月重輪行

三辰垂光照臨四海煥哉何煌煌悠悠與天地久長愚

見目前聖觀萬年明闇相絕何可勝言

詩

黎陽作二首

朝發鄴城夕宿韓陵霖雨載塗輿人困窮載馳載驅沐  
雨櫛風舍我高殿何為泥中在昔周武爰暨公旦載主  
而征救民塗炭彼此一時惟天所讚我獨何人能不靖

亂

其二

殷殷其雷濛濛其雨我徒我車涉此艱阻遵彼洹湄言  
刈其楚班之中路塗潦是御鞦鞞大車載低載昂嗷嗷  
僕夫載仆載僵蒙塗冒雨沾衣濡裳

黎陽作

千騎隨風靡萬騎正龍驤金鼓震上下干戚紛縱橫白  
旄若素霓丹旗發朱光追思太王德胥宇識足臧經歷  
萬歲林行行到黎陽

於譙作

清夜延賢客明燭發高光豐膳漫星陳旨酒盈玉觴絃  
歌奏新曲遊響拂丹梁餘音赴迅節慷慨時激揚獻酬  
紛交錯雅舞何鏘鏘羅纓從風飛長劍自低昂穆穆衆  
君子和合同樂康

餘一作繁

孟津

良辰啓初節高會構歡娛通天拂景雲俯臨四達衢羽  
爵浮象樽珍膳盈豆區清歌發妙曲樂正奏笙竽曜靈  
忽西邁炎燭繼望舒翊日浮黃河長驅旋鄴都

芙蓉池作

乘輦夜行遊逍遙步西園雙渠相溉灌嘉木繞通川  
卑枝拂羽蓋修條摩蒼天驚風扶輪轂飛鳥翔我前  
丹霞夾明月華星出雲間上天垂光彩五色一何鮮  
壽命非松喬誰能得神仙遨遊快心意保已終百年

於元武陂作

兄弟共行遊驅車出西城野田廣開闢川渠互相經  
黍稷何鬱鬱流波激悲聲菱葭覆綠水芙蓉發丹榮  
柳垂

重蔭綠向我池邊生  
乘渚望長洲羣鳥謹  
譁鳴萍藻泛  
濫浮澹澹隨風傾  
忘憂共容與暢此千秋情

至廣陵於馬上作

外編云廣陵觀兵魏志黃初六年十月行幸廣陵故城臨

江觀兵戎卒十餘萬旌旗數百里帝於馬上為詩是歲大寒冰舟不得入江乃引還

觀兵臨江水水流何湯湯  
戈矛成山林玄甲耀日光  
猛將懷暴怒膽氣正縱橫  
誰云江水廣一葦可以航  
不戰屈敵虜戢兵稱賢良  
古公宅岐邑實始翦殷商  
孟獻營虎牢鄭人懼稽顙  
充國務耕殖先零自破亡  
興農淮泗

間築室都徐方量宜運權略六軍咸悅康豈如東山詩

悠悠多憂傷

僧皎然云魏文軍至揚子見洪濤浪洶數日固天所以隔南北也賦詩而還魏文集

無此詩且魏文雄才智畧本非庸主如何有此示弱於孫權取笑於劉備陳壽謬矣按壽正史但云引還不言賦詩魏書注載此詩未嘗示弱也

豈客子常畏人邪襟詩魏書不載

### 襟詩二首

集云袍中作下篇云於黎陽作呂延濟以此詩未即位方為漢征伐李善

云當時實至廣陵則此與馬上詩為同時矣今觀弃置詩與天隔南北意合或近是耳

漫漫秋夜長烈烈北風涼展轉不能寐披衣起彷徨  
彷徨忽已久白露沾我裳俯視清水波仰看明月光天漢

回西流三五正縱橫草蟲鳴何悲孤鴈獨南翔鬱鬱多  
悲思綿綿思故鄉願飛安得翼欲濟河無梁向風長歎  
息斷絕我中腸

其二

西北有浮雲亭亭如車蓋惜哉時不遇適與飄風會吹  
我東南行行行至吳會吳會非我鄉安得久留滯棄置

勿復陳客子常畏人

藝苑卮言云讀子桓客子常畏人及答吳朝歌鍾大理書似少年美

資負才性而好貨好色且當不得恒亨者桓靈寶技藝  
差相埒而氣尚過之子桓乃得七年天子都所不解

清河作

方舟戲長水湛澹自浮沈絃歌發中流悲響有餘音  
聲入君懷悽愴傷人心心傷安所念但願恩情深願為

晨風鳥雙飛翔北林

湛澹藝文作澹澹悲響有餘音一作悲風漂餘音

清河見挽船士新婚與妻別作

藝文作徐幹為挽船士與新娶

妻別玉臺作文帝今從之

與君結新婚宿咎當別離涼風動秋草蟋蟀鳴相隨  
冽寒蟬吟蟬吟抱枯枝枯枝時飛揚身體忽遷移不悲

身遷移但惜歲月馳歲月無窮極會合安可知願為雙  
黃鵠比翼戲清池

黎陽作

奉辭討臯遐征晨過黎山巉岿東濟黃河金營北觀故  
宅頽傾中有高樓亭亭荆棘繞蕃叢生南望果園青青  
霜露慘悽宵零彼桑梓兮傷情

寡婦

友人阮元瑜早亡傷  
其妻孤寡為作此詩

霜露紛紛交下木葉落兮淒淒候鴈叫兮雲中歸燕翩  
兮徘徊妾心感兮惆悵白日急兮西頽守長夜兮思君  
魂一夕兮九乖悵延佇兮仰視星月隨兮天迴徒引領  
兮入房竊自憐兮孤悽願從君兮終沒愁何可兮久懷  
思君一  
作君思

令詩

漢獻帝傳云太史丞許芝條上魏王  
代漢圖讖王下令辭其詩在令中

喪亂悠悠過紀白骨從橫萬里哀哀下民靡恃吾將佐  
時整理復子明辟致仕

於明津作

遥遥山上亭皎皎雲間星遠望使心懷遊子戀所生驅

車出北門遥望河陽城

古辭長歌行與此同後有六句云凱風吹長棘天天枝葉傾黃

鳥飛相追咬咬美音聲竚

立望西河泣下沾羅纓

失題

見藝文  
廡部

巾車出鄴宮校獵東橋津重置施密網罕罽飄如雲鸞

弓忽高馳一發連雙鷹

後  
閱

見挽船士兄弟辭別詩

舍我故鄉客將適萬里道妻子牽衣袂落淚霑懷抱

後闕



漢魏六朝百三家集卷二十五



總校官庶吉士 臣侍 朝

校對官庶吉士 臣何思 鈞

謄錄監生 臣劉 垠

欽定四庫全書薈要

集部

漢魏六朝百三家集卷二十六



詳校官候選知縣臣吳甸華

欽定四庫全書蒼要卷一萬九千六百十五

集部

漢魏六朝百三家集卷二十六

明 張溥 輯

曹植集

賦

登臺賦

從明后而嬉遊兮登層臺以娛情見太府之廣開兮觀  
聖德之所營建高門之嵯峨兮浮雙闕乎太清立中天

之華觀兮連飛閣乎西城臨漳水之長流兮望園果之  
滋榮仰春風之和穆兮聽百鳥之悲鳴天雲恒其既立  
兮家願得而獲呈揚仁化於宇內兮盡肅恭於上京雖  
桓文之為盛兮豈足方乎聖明休矣美矣惠澤遠揚翼  
佐皇家兮寧彼四方同天地之矩量兮齊日月之輝光  
永貴尊而無極兮等年壽于東王

節遊賦

覽宮宇之顯麗實大人之攸居建三臺於前處飄飛陛

以凌虛連雲閣以遠徑營觀榭於城隅亢高軒以迴跳  
緣雲霓而結疏仰西嶽之崧岑臨漳滏之清渠觀靡靡  
而無終何渺渺而難殊亮靈后之所處非吾人之所廬  
於是仲春之月百卉叢生萋萋藹藹翠葉朱莖竹林青  
蔥珍果含榮凱風發而時鳥謹微波動而水蟲鳴感氣  
運之和順樂時澤之有成遂乃浮素蓋御驂騶命友生  
攜同儔誦風人之所歎遂駕言而出遊步北園而馳騫  
庶翺翔以解憂望洪池之滉漾遂降集乎輕舟浮沉蟻

於金壘行觴爵於好仇絲竹發而嚮厲悲風激於中流  
且容與以盡觀聊永日而忘愁嗟羲和之奮迅怨曜靈  
之無先念人生之不永若春日之微霜諒遺名之可紀  
信天命之無常愈志蕩以淫游非經國之大綱罷曲宴  
而旋服遂言歸乎舊房

臨觀賦

登高墉兮望四澤臨長流兮送遠客春風暢而氣通靈  
草含幹兮木交莖丘陵崛起兮松栢青南園夔兮果載榮

樂時物之逸豫悲予志之長違歎東山之遡勤歌式微  
以詠歸進無路以効功退無隱以營私俯無鱗以遊遁  
仰無翼以翻飛

遊觀賦

靜閒居而無事將遊目以自娛登北觀而啟路涉雲際  
之飛除從羆熊之武士荷長戟而先驅罷若雲歸會如  
霧聚車不及回塵不獲舉奮袂成風揮汗如雨

東征賦

有序

建安十九年王師東征吳寇余典禁兵衛宮省然神武一  
舉東夷必克想見振旅之盛故作賦一篇

登城隅之飛觀兮望六師之所營  
幡旗轉而心異兮舟楫  
動而傷情顧身微而任顯兮愧任重而命輕  
嗟我愁其何  
為兮心遙思而懸旌師旅憑皇穹之靈佑兮亮元勲之必  
舉揮朱旗以東指兮橫大江而莫御  
循戈櫓於清流兮汎  
雲梯而容與禽元帥於中舟兮振靈威於東野

藉田賦

營疇萬畝厥田上上竒柳夾路名果被園司農實掌是  
謂公田

述行賦

尋曲路之南隅觀秦政之驪墳哀黔首之罹毒酷始皇  
之為君濯余身於秦井偉湯禱之若焚

感節賦

携友生而游觀盡賓主之所求登高墉以永望冀消日  
以忘憂欣陽春之潛潤樂時澤之惠休望候鴈之翔集

想元鳥之來游嗟征夫之長勤雖處逸而懷愁懼天河  
之一迴沒我身乎長流豈吾鄉之足顧戀祖宗之靈丘  
唯人生之忽過若鑿石之末燿慕牛山之哀泣懼平仲  
之我笑折若華之翳日庶朱光之常照顧寄軀於飛蓬  
乘陽風而遠飄亮吾志之不從乃拊心以歎息青雲鬱  
其西翔飛鳥翩而上匿欲縱體而從之哀余身之無翼  
大風隱其四起揚黃塵之冥冥鳥獸驚以求羣草木紛  
其揚英見遊魚之涔灑感流波之悲聲內紆曲而潛結

心怛惕以中驚匪榮德之累身恐年命之早零慕歸全  
之明義庶不忝乎所生

娛賓賦

遂衍賓而高會兮丹幃暉以四張辨中厨之豐膳兮作  
齊鄭之妍倡文人騁其妙說兮飛輕翰而成章談在昔  
之清風兮總賢聖之紀綱欣公子之高義兮德芬芳其  
若蘭揚仁恩於白屋兮踰周公之棄餐聽仁風以忘憂  
兮美酒清而肴甘

潛志賦

潛大道以遊志希往昔之遐烈矯貞亮以作矢當苑囿  
乎呈藝驅仁義以為禽必忠信而後發退隱身以滅跡  
進出世而取容且摧剛而和謀接虔肅以靜恭亮知榮  
而守辱匪徇天以為通

玄暢賦

有序

夫富者非財也貴者非寶也或有輕爵祿而重榮聲者  
或有反性命而徇功名者是以孔老異情楊墨殊義聊

作斯賦名曰玄暢

夫何希世之大人罄天壤而作皇該仁聖之上義據神位以統方補五常之漏闕綴三代以維綱僥余生之倖祿邁九二之嘉祥上同契於稷高降合頴於伊望思薦寶以繼佩怨和璞之始鑄思黃鐘以協律怨伶夔之不存嗟所圖之莫合悵蘊結而延佇希鵬舉以搏天蹶青雲而奮羽舍余駟而改駕任中才之展御望前軌而致策顧後乘而安驅匪逞邁之短修取全貞而保素弘道

德以為宇築無怨以作藩播慈惠以為圃耕柔順以為  
田不媿景而慚魄信樂天之何欲逸千載而流聲超遺  
黎而度俗

閒居賦

何吾人之介特去朋匹而無儔出靡時以娛志入無樂  
以消憂何歲月之若驚復民生之無常感陽春之發節  
聊輕駕而遠翔登高丘以延企時薄暮而起雨仰歸雲  
以載奔遇蘭蕙之長圃冀芬芳之可服結春衡以延停

入虛廊之閒館步生風之高廡踐密邇之修除即蔽景  
之元宇翡翠翔於南枝元鶴鳴於北野青魚躍於東沼  
白鳥戲於西渚遂乃背通谷對綠波藉文茵翳春華丹  
轂更馳羽騎相過

九愁賦

嗟離思之難忘心慘毒而含哀踐南畿之末境越引領  
之徘徊眷浮雲以太息顧攀登而無階匪狗榮而愉樂  
信舊都之可懷恨時王之謬聽受奸枉之虛辭揚天威

以臨下忽放臣而不疑登高陵而反顧心懷愁而荒悴  
念先寵之既隆哀後施之不遂雖危亡之不豫亮無遠  
君之心刈桂蘭而秣馬舍余車於西林願接翼於歸鴻  
嗟高飛而莫攀因流景而寄言響一絕而不還傷時俗  
之趨險獨悵望而長愁感龍鸞而匿跡如吾身之不留  
竄江介之曠野獨眇眇而沉舟思孤客之可悲改予身  
之翩翔豈天監之孔明將時運之無常謂內思而自策  
笑乃昔之愆殃以忠言而見黜信母負於時王俗參差

而不齊豈毀譽之可同兢昏瞽以營私害予身之奉公  
共朋黨而妬賢俾予濟乎長江嗟大化之移易悲性命  
之攸遭愁慊慊而繼懷怛慘慘而情挽曠年載而不回  
長去君兮悠遠御飛龍之蜿蜒揚翠霓之華旌絕紫霄  
而高鶩飄弭節於天庭披輕雲而下觀覽九土之殊形  
顧南郢之邦壤咸蕪穢而倚傾駭盤桓而思服仰御驤  
以悲鳴紆予袂而長涕僕夫感以失聲履先王之正路  
豈淫徑之可遵知犯君之招咎恥干媚而求親顧旋復

之無軌長自棄於遐濱與麋鹿以為羣宿林藪之葳蕤  
野蕭條而極望曠千里而無人民生期於必死何自苦  
以終身寧作清水之沉泥不為濁路之飛塵踐蹊隧之  
危阻登峒堯之高岑見失羣之離獸覲偏棲之孤禽懷  
憤激以切痛苦回忍之在心愁戚戚其無為遊綠林而  
逍遙臨白水以悲嘯猿驚聽而失條亮無怨而棄逐乃  
余行之所招

叙愁賦

有序

時家二女弟故漢皇帝聘以為貴人家母見二弟愁思  
故令予作賦曰

嗟妾身之微薄信未達乎義方遭母氏之聖善奉恩化  
之彌長迄盛年而始立修女職於衣裳承師保之明訓  
誦六列之篇章觀圖像之遺形竊庶幾乎英皇委微軀  
於帝室充末列於椒房荷印紱之令服非陋才之所望  
對牀帳而太息慕二親以憎傷揚羅袖而掩涕起出戶  
而彷徨顧堂宇之舊處悲一別之異鄉

離思賦 有序

建安十六年大軍西討馬超太子留監國植時從焉意  
有憶戀遂作離思賦云

在肇秋之嘉月將曜師而西旗余抱疾以賓從扶衡軫  
而不怡慮征期之方至傷無階以告辭念慈君之光惠  
庶沒命而不疑欲畢力於旌麾將何心而遠之願我君  
之自愛為皇朝而寶已水重深而魚悅林修茂而鳥喜

釋思賦 有序

家弟出養族父郎中伊子以兄弟之愛心有戀然作此賦以贈之

彼翔友之離別猶求思乎白駒况同生之義絕重背親而為踈樂鴛鴦之同池羨比翼之共林亮根異其何戚痛別榦之傷心

幽思賦

倚高臺之曲隅處幽僻之間深望翔雲之悠悠羗朝霽而夕陰顧秋華而零落感歲莫而傷心觀躍魚於南沼

聆鳴鶴於北林搦素筆而慷慨揚大雅之哀吟仰清風  
以歎息寄余思於悲絃信有心而在遠重登高以臨川  
何余心之煩錯寧翰墨之能傳

愁思賦

四節更王兮秋氣悲遙思愴恍兮若有遺原野蕭條兮  
烟無依雲高氣靜兮露凝璣野草變色兮莖葉稀鳴蜩  
抱木兮鴈南飛歸室解裳兮步庭前月光照懷兮星依  
天居一世兮芳景遷松喬難慕兮誰能仙長短命也兮

獨何愆

懷親賦

有序

濟陽南澤有先帝故營遂停馬住駕造斯賦焉

獵平原而南驚覩先帝之舊營步壁壘之常制識旌麾之所停在官曹之典列心髣髴於平生回驥首而永游赴修途以尋遠情眷戀而顧懷魂須臾而九反

慰子賦

彼凡人之相親小離別而懷戀况中殤之愛子乃千秋

而不見入空室而獨倚對孤幃而切歎痛人亡而物在  
心何忍而復觀日晡晚而既沒月代照而舒光仰列星  
以至晨衣霑露而含霜惟逝者之日遠愴傷心而絕腸

靜思賦

夫何美女之爛妖紅顏曄而流光卓特出而無疋呈才  
好其莫當性通暢以聰惠行嬾密而妍詳蔭高岑以翳  
日臨綠水之清流秋風起於中林離鳥鳴而相求愁慘  
慘以增傷悲予安能乎淹留

歸思賦

背故鄉而遷徂將遙憇乎北濱經平常之舊居感荒壤  
而莫振城邑寂以空虛草木穢而荆蓐嗟喬木之無陰  
處原野其何為信樂土之足慕忽并日之載馳

洛神賦

有序

黃初三年余朝京師還濟洛川古人有言斯水之神名  
曰宓妃感宋玉對楚王說神女之事遂作斯賦其詞曰  
余從京師言歸東藩背伊闕越轅轅經通谷陵景山日

既西傾車殆馬煩爾迺稅駕乎蘅臯秣駟乎芝田容與  
乎楊林流眄乎洛川於是情移神駭忽焉思散俯則未  
察仰以殊觀覩一麗人於巖之畔爾迺援御者而告之  
曰爾有覲於彼者乎彼何人斯若此之豔也御者對曰  
臣聞河洛之神名曰宓妃則君王之所見也無迺是乎  
其狀若何臣願聞之余告之曰其形也翩若驚鴻婉若  
游龍榮曜秋菊華茂春松髣髴兮若輕雲之蔽月飄颻  
兮若流風之迴雪遠而望之皓若太陽升朝霞迫而察

之灼若芙蓉出淥波穠纖得中修短合度肩若削成腰  
如約素延頸秀項皓質呈露芳澤無加鈿華不御雲髻  
峩峩修眉聯娟丹脣外朗皓齒內鮮明眸善睐屬輔承  
權瓊姿豔逸儀靜體閑柔情綽態媚於語言竒服曠世  
骨像應圖披羅衣之璀璨兮珥瑤碧之華琚戴金翠之  
首飾綴明珠以耀軀踐遠游之文履曳霧綃之輕裾微  
幽蘭之芳藹兮步踟躕於山隅於是忽焉縱體以遨以  
嬉左倚采旄右蔭桂旗攘皓腕於神許兮采湍瀨之玄

芝余情悅其淑美兮心振蕩而不怡無良媒以接歡兮  
託微波而通辭願誠素之先達兮解玉佩而要之嗟佳  
人之信修兮羌習禮而明詩抗瓊瑋以和予兮指潛川  
而為期執眷眷之款實兮懼斯靈之我欺感交甫之棄  
言兮悵猶豫而狐疑收和顏而靜志兮申禮防以自持  
於是洛靈感焉徙倚傍徨神先離合乍陰乍陽竦輕軀  
以鶴立若將飛而未翔踐椒塗之郁烈步蘅薄而流芳  
超長吟以永慕兮聲哀厲而彌長爾迺衆靈雜還命儔

嘯侶或戲清流或翔神渚或採明珠或拾翠羽從南湘  
之二妃攜漢濱之游女歎匏瓜之無匹詠牽牛之獨處  
揚輕袿之綺靡翳修袖以延停體迅飛鳧飄忽若神陵  
波微步羅韞生塵動無常則若危若安進止難期若往  
若還轉眄流精光潤玉顏含辭未吐氣若幽蘭華容媿  
娜令我忘餐於是屏翳收風川后靜波馮夷鳴鼓女媧  
清歌騰文魚以警乘鳴玉鸞以偕逝六龍儼其齊首載  
雲車之容裔鯨鯢踊而夾轂水禽翔而為衛於是越北

止過南岡紆素領迴清揚動朱唇以徐言陳交接之大  
綱恨人神之道殊怨盛年之莫當抗羅袂以掩涕兮淚  
流襟之浪浪悼良會之永絕兮哀一逝而異鄉無微情  
以效愛兮獻江南之明璫雖潛處於太陰長寄心於君  
王忽不悟其所舍悵神霄而蔽光於是背下陵高足往  
心留遺情想象顧望懷愁冀靈體之復形御輕舟而上  
泝浮長川而忘反思緜緜而增暮夜耿耿而不寐霑繁  
霜而至曙命僕夫而就駕吾將歸乎東路攬馱轡以抗

策悵盤桓而不能去

記曰植初求甄逸女不遂後太祖回與五官中郎將植晝思夜想廢

寢與食黃初中入朝帝示植甄后玉鏤金帶枕植見之不覺泣下時已為郭氏讒死帝仍以枕賚植植還度輟

輟息洛水上因思甄氏忽若有見遂述其事作感甄賦

後明帝見之改為洛神賦變按植在黃初猜嫌方劇安

敢于帝前思甄泣下帝又何至以甄枕賜植此國章家

典所無也若事曰感甄而名托洛神間有之耳豈待明帝始改皆傳會者之過矣

愍志賦 有序

或人有好鄰人之女者時無良媒禮不成焉彼女遂行  
適人有言之於予者予心感焉乃作賦曰

竊托音於往昔迄來春之不從思同遊而無路情壅隔  
而靡通哀莫哀於永絕悲莫悲於生離豈良時之難俟  
痛子質之日虧登高樓以臨下望所歡之攸居去君子  
之清宇歸小人之蓬廬欲輕飛而從之迫禮防之我拘

出婦賦

以才薄之陋質奉君子之清塵承顏色以接意恐踈賤  
而不親悅新婚而忘妾哀愛惠之中零遂摧頰而失望  
退幽屏於下庭痛一旦而見棄心忉忉以悲驚衣入門

之初服背床室而出征攀僕御而登車左右悲而失聲  
嗟寃結而無訴乃愁苦以長窮恨無愆而見棄悼君施  
之不終

感婚賦

陽氣動兮淑清百卉鬱兮含英春風起兮蕭條蟄蟲出  
兮悲鳴顧有懷兮妖嬈用騷首兮屏營登清臺以蕩志  
伏高軒而游情悲良媒之不顧懼歡媾之不成慨仰首  
而太息風飄飄以動纓

大暑賦

炎帝掌節祝融司方羲和按轡南雀舞衡蛇折鱗於靈窟龍解角於皓蒼遂乃溫風赫戲草木垂榦山折海沸沙融礫爛飛魚躍渚潛龜浮岸鳥張翼而近栖獸交遊而雲散于時黎庶徙倚綦布葉分機女絕綜農夫釋耜背暑者不羣而齊跡向陰者不會而成羣於是大人遷居宅幽綏神育靈雲屋重構閒房肅清寒暑涌流玄木奮榮積素冰於幽館氣飛結而為霜奏白雪於琴瑟朔

風感而增涼

愁霖賦

迎朔風而爰邁兮雨微微而逮行  
悼朝陽之隱曜兮怨北辰之潛精  
車結轍以盤桓兮馬躑躅以悲鳴  
攀扶桑而仰觀兮假九日於天皇  
瞻沈雲之泱泱兮哀吾願之不將

又愁霖賦

夫季秋之淫雨兮既彌日而成霖  
瞻玄雲之晻晻兮聽

長空之淋淋中宵卧而歎息起飾帶而撫琴

喜霽賦

禹身逝於暘旰卒錫圭而告成湯感旱於殷時造桑林  
而敷誠動玉朝而雲披鳴鑿鈴而日陽指北極以為期  
吾將倍道而兼行

寶刀賦

有引

建安中家父魏王乃命有司造寶刀五枚三年乃就以  
龍虎熊馬雀為識太子得一余及余弟饒陽侯各得一

焉其餘二枚家王自仗之賦曰

有皇漢之明后思潛達而玄通飛文義以博致揚武備  
以禦凶乃熾火炎爐蝟鉄挺英烏獲奮椎歐冶是營扇  
景風以激氣飛光鑑於天庭爰告祠於太乙乃感夢而  
通靈然後礪以五方之石鑿以中黃之壤規員景以定  
環攄神思而造像垂華紛之歲蕤流翠采之晁熿陸斬  
犀革水斷龍舟輕擊浮截刃不截流踰南越之巨闕超  
有楚之太阿寔真人之攸御永天祿而是荷

九華扇賦

有引

昔吾先君常侍得幸漢桓帝賜尚方扇不方不圓其中  
結成文名曰九華其辭曰

有神區之名竹生不周之高岑對綠水之素波背玄澗  
之重深體虛暢以立榦播翠葉以成林形五離而九華  
篋蒼解而縷分效虬龍之蜿蜒法虹霓之氤氳因形致  
好不常厥儀方不應矩圓不中規隨皓腕以徐轉發惠  
風之微寒時氣清以方厲紛飄動兮綺紈

迷迭香賦

播西都之麗草兮應青春而凝暉流翠葉於纖柯兮結  
微根於丹墀信繁華之速實兮弗見凋於嚴霜芳暮秋  
之幽蘭兮麗崑崙之英芝既經時而收采兮遂幽殺以  
增芳去枝葉而特御兮入綃縠之霧裳附玉體以行止  
兮順微風而舒光

車渠梳賦

惟新梳之所生於涼風之浚湄采金光之定色擬朝陽

而發輝豐玄素之曄曄帶朱榮之歲綈緼絲綸以肆采  
藻繁布以相追翩飄颻而浮景若驚鵠之雙飛隱神璞  
於西野彌百葉而莫希於時乃有篤厚神后廣被仁聲  
夷慕義而重使獻茲寶於斯庭命公輸之巧匠窮妍麗  
之殊形華色燦爛文若點成鬱蓊雲蒸蜿蜒龍征光如  
激電影若浮星何神怪之巨偉信一覽而九驚雖離朱  
之聰目內炫耀而失精何明麗之可悅超羣寶而特章  
俟君子之閑燕酌甘醴於斯觥既娛情而可貴故永御

而不忘

酒賦

有序

余覽揚雄酒賦辭甚瑰瑋頗戲而不雅聊作酒賦粗究其終始賦曰

嘉儀氏之造思亮茲美之獨珍仰酒旗之景曜協嘉號於天辰穆生以醴而辭楚侯羸感爵而輕身其味有宜城醪醴蒼梧縹清或秋藏冬發或春醞夏成或雲沸潮涌或素蟻浮萍爾乃王孫公子遊俠翺翔將承芳以接

意會陵雲之朱堂獻酬交錯宴笑無方以是飲者並醉  
縱橫誼譁或揚袂屢舞或扣劍清歌或嘖嘖辭觴或奮  
爵橫飛或歌驪駒既駕或稱朝露未晞於斯時也質者  
或文剛者或仁卑者忘賤窶者忘貧於是矯俗先生聞  
之而歎曰噫夫言何容易此乃滛荒之源非作者之事  
若耽於觴酌流情縱逸先王所禁君子所斥

植橘賦

有朱橘之珍樹於鶉火之遐鄉稟太陽之烈氣嘉杲日

之休光體天然之素分不遷徙於殊方播萬里而遙植  
列銅爵之園庭背山川之暖氣處玄朔之肅清邦換壤  
別爰幾喪生處彼不凋在此先零朱實不啣焉得素榮  
惜寒暑之不均嗟華實之永乖仰凱風以傾葉冀炎氣  
之可懷颺鳴條以流響希越鳥之來栖夫靈德之所感  
物無微而不和神蓋幽而易激信地道之不訛既萌根  
而弗榦諒結葉而不華漸玄化而弗變非彰德於邦家  
附微條以歎息哀草木之難化

芙蓉賦

覽百卉之英茂無斯華之獨靈結修根於重壤泛清流  
而擢莖其始榮也皦若夜光尋扶桑其揚暉也晃若九  
陽出暘谷芙蓉蹇產齒苞星屬絲條垂珠丹榮吐綠焜  
焜韡韡爛若龍燭觀者終朝情猶未足於是狡童媛女  
相與同遊擢素手於羅袖接紅葩於中流

槐賦

羨良木之華麗爰獲貴於至尊憑文昌之華殿森列峙

乎端門觀朱穰以振條據文陞而結根暢沈陰以溥覆  
似明后之垂恩在季春以初茂踐朱夏而乃繁覆陽精  
之炎景散流耀以增鮮

神龜賦

有序

龜壽千歲時有遺余龜者數日而死肌肉消盡唯甲存  
焉余感而賦之曰

嘉四靈之建德各潛位乎一方蒼龍虬於東嶽白虎嘯  
於西崗元武集於寒門朱雀棲於南鄉順仁風以消息

應聖時而後翔嗟神龜之奇物體乾坤之自然下夷方以則地上規隆而法天順陰陽以呼吸藏景曜於重泉餐飛塵以實氣飲不竭於朝露步容趾以俯仰時鸞回而鶴顧忽萬載而不恤周無疆於太素感白龍之翔翥卒不免乎豫且雖見珍於宗廟羅剝剝之重辜欲愬怨於上帝將等愧乎游魚懼沈泥之逢殆赴芳蓮以巢居安玄雲而好靜不淫翔而改度昔嚴周之抗節援斯靈而托喻嗟祿運之屯蹇終遇獲於江濱歸籠檻以幽處

遭淳美之仁人晝顧瞻以終日夕撫順而接晨邁淫災  
以殞越命勦絕而不振天道昧而未分神明幽而難燭  
黃氏沒於空澤松喬化於株木蛇折鱗於平臯龍脫骨  
於深谷亮物類之遷化疑斯靈之解殼

白鶴賦

嗟皓麗之素鳥兮含竒氣之淑祥薄幽林以屏處兮蔭  
重景之餘光狹單巢於弱條兮懼春風之難當無沙棠  
之逸志兮欣六翮之不傷承邂逅之僥倖兮得接翼於

鸞凰同毛衣之氣類兮信休息之同行痛美會之中絕  
兮遘嚴災而逢殃共太息而祇懼兮抑吞聲而不揚傷  
本規之違忤悵離羣而獨處恒竄伏以窮栖獨哀鳴而  
戢羽冀大綱之難結得奮翅而遠遊聆雅琴之清韻記  
六翮之末流

鸚鵡賦

美中州之令鳥越衆類之殊名感陽和而振翼遁太陰  
以存形遇旅人之嚴網殊六翮之無遺身挂滯於重籠

孤鳴鳴而獨歸豈予身之足惜憐衆雛之未飛分糜軀  
以潤鑊何全濟之敢希蒙含育之厚德奉君子之光輝  
怨身輕而施重恐往惠之中虧常戢心以懷懼雖處安  
其若危永哀鳴其報德庶終來而不疲

離繳鴈賦

有引

余遊於武陵中有鴈離繳不能復飛顧命舟人追而得  
之故憐而賦焉

憐孤鴈之偏特情惆焉而內傷尋淑類之殊異兮稟上

天之休祥含中和之純氣赴四節而征行遠玄冬於南  
裔兮避炎夏於朔方白露淒以飛兮秋風發乎西商感  
節運之復至今假魏道而翱翔接羽翮以南北兮情逸  
豫而永康望范氏之發機兮播織繳以凌雲挂微軀之  
輕翼兮忽頽落而離羣旅朋驚而鳴逝兮徒矯首而莫  
聞甘充君之下厨膏函牛之鼎鑊蒙生全之顧覆何恩  
施之隆溥於是縱軀歸命無慮無求饑食稻梁渴飲清  
流

鵑賦 有引

鵑之為禽猛氣共鬪終無勝負期於必死遂賦之焉

美遐圻之偉鳥生太行之巖阻體貞剛之烈性亮金德  
之所輔戴毛角之雙立揚玄黃之勁羽其沉隕而重辱  
有節俠之儀矩降居檀澤高處保岑遊不同嶺棲必異  
林若有翻雄駭逝孤鷗驚翔則長鳴挑敵鼓翼專場踰  
高越壑雙不隻僵階侍斯珥俯耀文墀成武官之首飾  
增庭燎之高輝

鷓鴣賦

鷓欲取雀雀自言雀微賤身體些小肌肉瘠瘦所得蓋  
少君欲相噉實不足飽鷓得雀言初不敢語頃來輒軻  
資糧乏旅三日不食畧思死鼠今日相得寧復置汝雀  
得鷓言意甚怔營性命至重雀鼠貪生君得一食我命  
是傾皇天降鑑賢者是聽鷓得雀言意甚怛惋當死斃  
雀頭如果蒜不早首服烈頸大喚行人聞之莫不往觀  
雀得鷓言意甚不移目如擘椒跳蕭二翅我當死矣畧

無可避鷄乃置雀良久方去二雀相逢似是公嫗相將  
入草共上一樹仍叙本末辛苦相語向者近出為鷄所  
捕賴我翻捷體素便附說我辨語千條萬句欺恐舍長  
令兒大怖我之得免復勝於免自今徒意莫復相妬

蟬賦

惟夫蟬之清素兮潛厥類乎太陰在盛陽之仲夏兮始  
遊豫乎芳林實澹泊而寡慾兮獨怡樂而長吟聲皦皦  
而彌厲兮似貞士之介心內含和而弗食兮與衆物而

無求棲高枝而仰首兮漱朝露之清流  
隱柔桑之稠葉兮快啁號以遁暑  
苦黃雀之作害兮患螳螂之勁斧  
冀飄翔而遠托兮毒蜘蛛之網罟  
欲降身而卑竄兮懼草蟲之襲予  
免衆難而弗獲兮遙遷集乎宮宇  
依名果之茂陰兮托修幹以靜處  
有翩翩之狡童兮步容與於園圃  
體離朱之聰視兮姿才捷於獼猿  
條罔葉而不挽兮樹無榦而不緣  
翳輕軀而奮進兮跪側足以自閑  
恐余身之驚駭兮精曾睨而目連  
持柔竿之冉冉兮運微黏

而我纏欲翻飛而逾滯兮知性命之長捐亂曰詩歎鳴  
蜩聲嘒嘒兮盛陽則來太陰逝兮皓皓貞素侔夷節兮  
帝臣是戴尚其潔兮

蝙蝠賦

吁何姦氣生茲蝙蝠形殊性詭每變常式行不由足飛  
不假翼明伏暗動盡似鼠形謂鳥不似二足為毛飛而  
含齒巢不哺齧空不乳子不容毛羣斥逐羽族下不蹈  
陸上不馮木

遷都賦序

余初封平原轉出臨淄中命鄆城遂徙雍丘改邑浚儀  
而末將適于東阿號則六易居實三遷連遇瘠土衣食  
不繼

騷

九詠

芙蓉車兮桂衡結萍蓋兮翠旌駟蒼虬兮翼轂駕陵魚  
兮驂鯨茵薦兮蘭席蕙幃兮苓牀抗南箕兮簸瓊藥挹

天河兮滌玉觴靈既降兮泊靜默登文階兮坐紫房服  
春榮兮倚靡雲裾繞兮容裔冠北辰兮岌岌帶長虹兮  
陵厲蘭肴御兮玉俎陳雅音奏兮文虞羅感漢廣兮羨  
游女揚激楚兮詠湘娥臨迴風兮浮漢渚目牽牛兮眺  
織女交有際兮會有期嗟痛吾兮來不時來無見兮進  
無聞泣下雨兮歎成雲先後悔其靡及冀后王之一悟  
猶搦轡而繁策馳覆車之危路羣秉舟而無楫將何川  
而能度何世俗之蒙昧悼邦國之未靜焚椒蘭其望治

由倒裳而求領尋湘漢之長流採芳岸之靈芝遇遊女  
於水裔採菱花而結詞野蕭條以極望曠千里而無人  
民生期於必死何自苦以終身寧作清水之沉泥不為  
濁路之飛塵

令

黃初五年令

夫遠不可知者天也近不可知者人也傳曰知人則哲  
堯猶病諸諺曰人心不同若其面焉唯女子與小人為

難養也近之則不遜遠之則有怨詩云憂心悄悄愠于羣小自世間人或受寵而背恩或無故而入叛違顧左右曠然無信大嚼者咋斷其舌右手執斧左手親鉞傷夷一身之中尚有不可信况於人乎唯無深瑕潛釁隱過匿愆乃可以為人諺曰穀千鴛不如養一驢又曰穀鴛養虎大無益也乃知韓昭侯之弊袴良有以也使臣有三品有可以仁義化者有可以恩惠驅者不足以尊之則當以刑罰使之刑罰復不足以率之則明主所不

畜故唐堯至仁不能容無益之子湯武至聖不能養無益之臣九折臂知為良醫吾知所以待下矣諸吏各敬爾在位推一槩之平功之宜賞於疏必與罪之宜戮在親不赦此令之行有若皓日於戲羣臣共覽之哉

黃初六年令

身輕於鴻毛而謗重於泰山賴蒙帝王天地之仁違百司之典議舍三千之首戾反我舊居襲我初服雲雨之施焉有量哉孤以何功而納斯貶富而不恡寵至不驕

者則周公其人也。孤小人爾身更以榮為戚，何者？將恐簡易之尤出於細微，脫爾之愆一朝復露也。故欲修吾往業，守吾初志，欲使皇帝恩在摩天，使孤心常存此地。將以全陛下厚德，究孤犬馬之年，此難能也。然固欲行衆之難，詩曰：德輶如毛，鮮克舉之。此之謂也。

寫灌均上事令

孤前令寫灌均所上孤章三臺九府所奏事及詔書一通置之座隅，孤欲朝夕諷詠以自警誡。

表

求自試表

臣植言臣聞士之生世入則事父出則事君事父尚於榮親事君貴於興國故慈父不能愛無益之子仁君不能畜無用之臣夫論德而授官者成功之君也量能而受爵者畢命之臣也故君無虛授臣無虛受虛授謂之謬舉虛受謂之尸祿詩之素餐所由作也昔二虢不辭兩國之任其德厚也且奭不讓燕魯之封其功大也今

臣蒙國重恩三世於今矣正值陛下升平之際沐浴聖澤潛潤德教可謂厚幸矣而位竊東藩爵在上列身被輕煖口厭百味目極華靡耳倦絲竹者爵重祿厚之所致也退念古之受爵祿者有異於此皆以功勤濟國輔主惠民今臣無德可述無功可紀若此終年無益國朝將挂風人彼己之譏是以上慙玄冕俯愧朱紱方今天下一統九州晏如顧西尚有違命之蜀東有不臣之吳使邊境未得稅甲謀士未得高枕者誠欲混同宇內以

致太和也故啟滅有扈而夏功昭成克商奄而周德著

今陛下以聖明統世將欲卒文武之功繼成康之隆簡  
良授能以方叔召虎之臣鎮衛四境為國爪牙者可謂  
當矣然而高鳥未挂於輕繳淵魚未懸於鈎餌者恐鈞  
射之術或未盡也昔耿弇不俟光武亟擊張步言不以  
賊遺於君父也故車右伏劍於鳴轂雍門刎首於齊境  
若此二子豈惡生而尚死哉誠忿其慢主而凌君也夫  
君之寵臣欲以除患興利臣之事君必殺身靜亂以功

報主也昔賈誼弱冠求試屬國請係單于之頸而制其命終軍以妙年使越欲得長纓占其王羈致北闕此二臣者豈好為夸主而曜世俗哉志或鬱結欲逞其才力輸能於明君也昔漢武為霍去病治第辭曰匈奴未滅臣無以家為夫憂國忘家捐軀濟難忠臣之志也今臣居外非不厚也而寢不安席食不遑味者以二方未尅為念伏見先帝武臣宿兵年耆即世者有聞矣雖賢不乏世宿將舊卒由習戰也竊不自量志在效命庶立毛

髮之功以報所受之恩若使陛下出不世之詔效臣雖  
刀之用使得西屬大將軍當一校之隊若東屬大司馬  
統偏師之任必乘危蹈險騁舟奮驪突刀觸鋒為士卒  
先雖未能擒權馘亮庶將虜其雄率殲其醜類必效須  
臾之捷以滅終身之愧使名挂史筆事列朝策雖身分  
蜀境首懸吳闕猶生之年也如微才弗試沒世無聞徒  
榮其軀而豐其體生無益於事死無損於數虛荷上位  
而忝重祿禽息鳥視終於白首此徒囹圜之養物非臣

之所志也流聞東軍失備師徒小衄輟食棄餐奮袂攘  
袵撫劔東顧而心已馳於吳會矣臣昔從先武皇帝南  
極赤岸東臨滄海西望玉門北出玄塞伏見所以行師  
用兵之勢可謂神妙矣故兵者不可豫言臨難而制變  
者也志欲自効於明神立功於聖世每覽史籍觀古忠  
臣義士出一朝之命以徇國家之難身雖屠裂而功銘  
著於景鍾名稱垂於竹帛未嘗不撫心而歎息也臣聞  
明主使臣不廢有罪故犇北敗軍之將用而秦魯以成

其功絕纓盜馬之臣赦而楚趙以濟其難臣竊感先帝  
早崩威王棄世臣獨何人以堪長久常恐先朝露填溝  
壑墳土未乾而身名並滅臣聞騏驥長鳴伯樂昭其能  
盧狗悲號韓國知其才是以效之齊楚之路以逞千里  
之任試之狡兔之捷以驗搏噬之用今臣志狗馬之微  
功竊自惟度終無伯樂韓國之舉是以於悒而竊自痛  
者也夫臨博而企竦聞樂而竊抃者或有賞音而識道  
也昔毛遂趙之陪隸猶假錐囊之喻以寤主立功何況

巍巍大魏多士之朝而無慷慨死難之臣乎夫自銜自  
媒者士女之醜行也干時求進者道家之明忌也而臣  
敢陳聞於陛下者誠與國分形同氣憂患共之者也冀  
以塵霧之微補益山海螢燭末光增輝日月是以敢冒  
其醜而獻其忠必知為朝士所笑聖主不以人廢言伏  
惟陛下少垂神聽臣則幸矣

求通親親表

臣植言臣聞天稱其高者以無不覆地稱其廣者以無

不載日月稱其明者以無不照江海稱其大者以無不  
容故孔子曰大哉堯之為君惟天為大惟堯則之夫天  
德於萬物可謂弘廣矣蓋堯之為教先親後疎自近及  
遠其傳曰克明峻德以親九族九族既睦平章百姓及  
周之文王亦崇厥化其詩曰刑于寡妻至於兄弟以御  
于家邦是以雍雍穆穆風人詠之昔周公弔管蔡之不  
咸廣封懿親以藩屏王室傳曰周之宗盟異姓為後誠  
骨肉之恩爽而不離親親之義寔在敦固未有義而後

其君仁而遺其親者也惟陛下資帝唐欽明之德體文  
王翼翼之仁惠洽椒房恩昭九族羣臣百僚番休遞上  
執政不廢於公朝下情得展於私室親理之路通慶弔  
之情展誠可謂恕已治人推惠施恩者矣至於臣者人  
道絕緒禁錮明時臣竊自傷也不敢乃望交氣類修人  
事叙人倫近且婚媾不通兄弟永絕吉凶之間塞慶弔  
之禮廢恩紀之違甚於路人隔閔之異殊於胡越今臣  
以一切之制永無朝覲之望至於注心皇極結情紫闥

神明知之矣然天實為之謂之何哉退省諸王常有戚戚具爾之心願陛下沛然垂詔使諸國慶問四節得展以叙骨肉之歡恩全怡怡之篤義妃妾之家膏沐之遺歲得再通齊義於貴宗等惠於百司如此則古人之所歎風雅之所詠復存於聖世矣臣伏自惟省無錐刀之用及觀陛下之所拔授若以臣為異姓竊自料度不後於朝士矣若得辭遠遊戴武弁解朱組佩青紱駙馬奉車趣得一號安宅京室執鞭珥筆出從華蓋入侍輦轂

承答聖問拾遺左右乃臣丹情之至願不離於夢想者也遠慕鹿鳴君臣之宴中詠棠棣匪他之誠下思伐木友生之義終懷蓼莪罔極之哀每四節之會塊然獨處左右唯僕隸所對唯妻子高談無所與陳發義無所與展未嘗不聞樂而拊心臨觴而歎息也臣伏以為犬馬之誠不能動人譬人之誠不能動天崩城隕霜臣初信之以臣心况徒虛語耳若葵藿之傾葉太陽雖不為之迴光然終向之者誠也臣竊自比

葵藿若降天地之施垂三光之明者寔在陛下臣聞  
文子曰不為福始不為禍先今之否隔友于同憂而  
臣獨唱言者何也竊不願於聖代使有不蒙施之物  
有不蒙施之物必有慘毒之懷故栢舟有天只之怨  
谷風有棄予之歎伊尹恥其君不為堯舜孟子曰不  
以舜之所以事堯事其君者不敬其君者也臣之愚  
蔽固非虞伊至於欲使陛下宗光被時雍之美宣緝  
熙章明之德者是臣悽悽之誠竊所獨守寔懷鶴立

企佇之心敢復陳聞者冀陛下儻發天聰而垂神聽也

陳審舉表

臣聞天地協氣而萬物生君臣合德而庶政成五帝之世非皆智三季之末非皆愚用與不用知與不知也既時有舉賢之名而無得賢之實必各援其類而進矣諺曰相門有相將門有將夫相者文德昭也將者武功烈者也文德昭則可以匡國朝致雍熙稷契夔龍是也

武功烈則可以征不庭威四夷南仲方叔是矣昔伊尹  
之為媵臣至賤也呂尚之處屠釣至陋也及其見舉於  
湯武周文誠道合志同玄謨神通豈復假近習之薦因  
左右之介哉書曰有不世之君必能用不世之臣用不  
世之臣必能立不世之功殷周二王是矣若夫齷齪近  
步遵常守故安足為陛下言哉故陰陽不和三光不暢  
官曠無人庶政不整者三司之責也疆場騷動方隅內  
侵沒軍喪衆干戈不息者邊將之意也豈可虛荷國寵

而不稱其任哉故任益隆者負益重位益高者責益深  
書稱無曠庶官詩有職思其憂此其義也陛下體天真  
之淑聖登神機以繼統冀聞康哉之謌偃武行文之美  
而數年以來水旱不時民困衣食師徒之發歲歲增調  
加東有覆敗之軍西有殪沒之將至使蚌蛤浮翔於淮  
泗鼪鼯謹譁於林木臣每念之未嘗不輟食而揮餐臨  
觴而搯腕矣昔漢文發代疑朝有變宋昌曰內有朱虛  
東牟之親外有齊楚淮南琅邪此則盤石之宗願王勿

疑臣伏惟陛下遠覽姬文二虢之援中慮周成召畢之輔下存宋昌磐石之固昔騏驥之於吳阪可謂困矣及其伯樂相之孫郵御之形體不勞而坐取千里蓋伯樂善御馬明君善御臣伯樂馳千里明君致太平誠任賢使能之明效也若朝司惟良萬機內理武將行師方難克弭陛下可得雍容都城何事勞動鑿駕暴露於邊境哉臣聞羊質虎皮見草則悅見豺則戰忘其皮之虎也今置將不良有似於此故語曰患為之者不知知之者

不得為也昔樂毅奔趙心不忘燕庶頗在楚思為趙將  
臣生乎亂長乎軍又數承教於武皇帝伏見行師用兵  
之要不必取孫吳而闇與之合竊揆之於心常願得一  
奉朝覲排金門蹈玉陛列有職之臣賜須臾之間使臣  
得一散所懷攄舒蘊積死不恨矣被鴻臚所下發士息  
書期會甚急又聞豹尾已建戎軒驚駕陛下將復勞玉  
躬擾挂神思臣誠竦息不遑寧處願得策馬執鞭首當  
塵露撮風后之奇接孫吳之要追慕卜商起予左右效

命先驅畢命輪轂雖無大益冀有小補然天高聽遠情不上通徒獨望青雲而拊心仰高天而歎息耳屈平曰國有驥而不知乘焉皇皇而更索昔管蔡放誅周召作弼叔魚陷刑叔向匡國三監之釁臣自當之二南之輔求不必遠華宗貴族藩王之中必有應斯舉者故傳曰無周公之親不得行周公之事唯陛下少留意焉近者漢氏廣建藩王豐則連城數十約則饗食祖宗而已未若姬周之樹國五等之品制也若扶蘇之諫始皇淳于

越之難周青臣可謂知時變矣夫能使天下傾耳注目者當權者是矣故謀能移主威能懾下豪右執政不在親戚權之所在雖疏必重勢之所去雖親必輕蓋取齊者田族非呂宗也分晉者趙魏非姬姓也惟陛下察之苟吉專其位凶離其患者異姓之臣也欲國之安祈家之貴存共其榮沒同其禍者公族之臣也今反公族疏而異姓親臣竊惑焉臣聞孟子曰君子窮則獨善其身達則兼善天下今臣與陛下踐冰履炭登山浮澗寒溫

燥濕高下共之豈得離陛下哉不勝憤懣拜表陳情若有不合乞且藏之書府不便滅棄臣死之後事或可思若有毫釐少挂聖意者乞出之朝堂使夫博古之士糾臣表之不合義者如是則臣願足矣

諫取諸國士息表

臣聞古者聖君與日月齊其明四時等其信是以戮凶無重賞善無輕怒若驚霆喜若時雨恩不中絕教無二可以此臨朝則臣下知所死矣受任在萬里之外審主

之所以受官必已之所以投命雖有構會之徒泊然不  
以為懼者蓋君臣相信之明效也昔章子為齊將人有  
告之反者威王曰不然左右曰王何以明之王曰聞章  
子改葬死毋彼尚不欺死父顧當叛生君乎此君之信  
臣也昔管仲親射桓公後幽囚從魯檻車載使少年挽  
而送齊管仲知桓公之必用已懼魯之悔謂少年曰吾  
為汝唱汝為和聲和聲宜走於是管仲唱之少年走而  
和之日行數百里宿昔而至至則相齊此臣之信君也

臣初受封策書曰植受茲青社封於東土以屏翰皇家  
為魏藩輔而所得兵百五十人皆年在耳順或不踰矩  
虎賁官騎及親事凡二百餘人正復不老皆使年壯備  
有不虞檢校乘城顧不足以自救况皆復耄耄罷曳乎  
而名為魏東藩使屏翰王室臣竊自羞矣就之諸國國  
有士子合不過五百人伏以為三軍益損不復賴此方  
外不定必當須辦者臣願將部曲倍道奔赴夫妻負襁  
子弟懷糧蹈鋒履刃以徇國難何但習業小兒哉愚誠

以揮涕增河魃鼠飲海於朝萬無損益於臣家計甚有  
廢損又臣士息前後三送蕪人已竭惟尚有小兒七八  
歲已上十六七已還三十餘人今部曲皆年者卧在牀  
席非糜不食眼不能視氣息裁屬者凡三十七人疲瘵  
風靡疣盲聾瞶者二十三人惟正須此小兒大者可備  
宿衛雖不足以禦寇粗可以警小盜小者未堪大使為  
可使耘鉏穢草驅護鳥雀休候人則一事廢一日獵則  
衆業散不親自經營則功不攝常自躬親不委下吏而

已陛下聖仁恩詔三至士子給國長不復發明詔之下  
有若皦日保金石之恩必明神之信晝然自固如天如  
地定習業者並復見送晦若晝晦悵然失圖伏以為陛  
下既爵臣百寮之右居藩國之任為置卿士屋名為宮  
冢名為陵不使其危居獨立無異於凡庶若栢成欣於  
野耕子仲樂於灌園蓬戶茅牖原憲之宅也陋巷簞瓢  
顏子之居也臣才不見效用常慨然執斯志焉若陛下  
聽臣悉還部曲罷官屬省監官使解璽釋紱追栢成子

仲之業營顏淵原憲之事居子臧之廬宅延陵之室如此雖進無成功退有可守身死之日猶松喬也然伏度國朝終未肯聽臣之若是固當羈絆於世繩維繫於祿位懷屑屑之小憂執無已之百念安得蕩然肆志逍遙於宇宙之外哉此願未從陛下必欲崇親親篤骨肉潤白骨而榮枯木者惟垂仁德以副前思

諫伐遼東表

臣伏以遼東負阻之國勢便形固帶以遼海今輕車遠

攻師疲力屈彼有其備所謂以逸待勞以飽制饑者也  
以臣觀之誠未易攻也若國家攻之而必克屠襄平之  
城懸公孫之首得其地不足以償中國之費虜其民不  
足以補三軍之失是我所獲不如所喪也若其不拔曠  
日持久暴師於野然天時不測水濕無常彼我之兵連  
於城下進則有高城深池無所施其功退則有歸途不  
通道路濺沁東有待釁之吳西有伺隙之蜀吳起東南  
則荆揚騷動蜀應西境則雍涼三分兵不解於外民罷

困於內促耕不解其饑疾蠶不救其寒夫渴而後穿井  
饑而後殖種可以圖遠難以應卒也臣以為當今之務  
在於省徭後薄賦歛勤農桑三者既備然後令伊管之  
臣得施其術孫吳之將得奮其力若此則太平之基可  
立而待康哉之歌可坐而聞曾何憂於二敵何懼於公  
孫乎今不息邦畿之內而勞神於蠻貊之域竊為陛下  
不取也

慶文帝受禪表

陛下以聖德龍飛順天革命允答神符誕作民主乃祖  
先后積德累仁世濟其美以暨於先王勤恤民隱劬勞  
戮力以除其害經營四方不遑啟處是用隆茲福慶先  
啟於魏陛下承統贊成前緒克廣德音綏靜內外紹先  
周之舊跡襲文武之懿德保大定功海內為一豈不休  
哉

慶受禪上禮表

陛下以明聖之德受天顯命良辰即祚以臨天下洪化

宣流洋溢宇內是以普天率土莫不承風欣慶執贄奔走奉賀闕下况臣親體至戚懷歡踊躍

龍見賀表

臣聞鳳凰復見於鄴南黃龍雙出於清泉聖德至理以致嘉瑞將棲鳳於林囿豢龍於陂池為百姓旦夕之所觀

初封安鄉侯表

臣挹罪即道憂惶恐怖不知刑罪當所限齊陛下哀愍

臣身不聽有司所執待之過厚即日於延津受安鄉侯  
印綬奉詔之日且懼且悲懼於不修始違憲法悲於不  
慎速此貶退上增陛下垂念下遺太后見憂臣自知罪  
深責重受恩無量精魄飛散忘軀殞命

封甄城王謝表

臣愚駑垢穢才質疵下過受陛下日月之恩不能摧身  
碎首以答陛下厚德而狂悖發露始干天憲自分放棄  
抱罪終身苟貪視息無復晷幸不悟聖恩爵以非望枯

木生葉白骨更肉非臣罪戾所當宜蒙俯仰慙惶五內  
戰悸奉詔之日悲喜參至雖因拜章陳答聖恩下情未  
展

轉封東阿王謝表

奉詔太皇太后念雍丘下濕少桑欲轉東阿當合王意  
可遣人按行知可居不奉詔之日伏增悲喜臣以無功  
虛荷國恩爵尊祿厚用無益於時脂車秣馬志在黜放  
不圖陛下天父之恩猥宣皇太后慈母之念遽之陛下

幸為久長計聖旨惻隱恩過天地臣在雍丘劬勞五年  
左右罷怠居業向定園果萬株枝條始茂私情區區實  
所重棄然桑田無業左右貧窮食裁餬口形有裸露臣  
聞古之仁君必有棄國以為百姓况乃轉居沃土人從  
蒙福江海所流無地不潤雲雨所加無物不茂若陛下  
念臣入從五年之勤少見佐助此枯木生華白骨更肉  
非臣之敢望也饑者易食寒者易衣臣之謂矣

謝妻改封陳妃表

璽書今以東阿王妃為陳王妃并下印綬因故上前所  
假印以其拜授書以即日到臣輒奉詔拜其才質底下  
謬同受私遇寵素餐臣為其首陛下體乾坤育物之德  
東海含容之大乃復隨例顯封大國光揚章灼非臣負  
薪之才所宜克當非臣穢釁所宜蒙獲夙夜憂歎念報  
罔極洪施遂隆既榮枝幹猥復正臣妃為陳妃光耀宣  
朗非妾婦蠢愚所當蒙被葵藿草物猶感恩養况臣含  
氣銜珮弘惠歿而後已誠非翰墨屢辭所能報答

謝入覲表

臣得出幽屏之城獲覲百官之美此一喜也背茅茨之陋登閭闔之闡此二喜也必有覲之容瞻見穆穆之顏此三喜也將以禱杙之質稟受崇聖之訓此四喜也

又

不世之命非所致思有若披浮雲而覩白日出幽谷而登喬木日希庭燎心存泰極

謝周觀表

詔使周觀初玩雲盤北觀疏圃遂步九華神明特處謫  
詭天然誠可謂帝室皇居者矣雖崑崙閭風之麗文昌  
之居不是過也

謝明帝賜食表

近得賜御食拜表謝恩尋奉手詔愍臣瘦弱奉詔之日  
涕泣橫流雖文武二帝所以愍憐於臣不復過於明詔  
謝賜柰表

即夕殿中虎賁宣詔賜臣等冬柰一奩詔賜使温啖夜

非食時而賜見及柰以夏熟今則冬至物以非時為珍  
恩以絕口為厚非臣等所宜荷之

謝鼓吹表

許以簫管之樂榮以田游之嬉陛下仁重有虞恩過周  
旦濟世安宗實在聖德

答明帝詔表

奉詔所作故平原公主誄文義相扶章章殊典句句感

切

上責躬詩表

臣植言臣自抱釁歸蕃刻肌刻骨追思罪戾晝分而食  
夜分而寢誠以天網不可重罹聖恩難可再恃切感相  
鼠之篇無禮造死之義形影相弔五情愧赧以罪棄生  
則違古賢夕改之勸忍垢苟全則犯詩人胡顏之譏伏  
惟陛下德象天地恩隆父母施暢春風澤如時雨是以  
不別荆棘者慶雲之惠也七子均養者鳩鳩之仁也舍  
罪責功者明君之舉也矜愚愛能者慈父之恩也是以

愚臣徘徊於恩澤而不敢自棄者也前奉詔書臣等絕  
朝心離志絕自分黃耆永無執圭之望不圖聖詔猥垂  
齒召至止之日馳心輦轂僻處西館未奉闕廷踊躍之  
懷瞻望反側不勝犬馬戀主之情謹拜表并獻詩二首  
詞旨淺末不足採覽貴露下情冒顏以聞

上卞太后誄表

太行皇太后資坤元之性體載物之仁齊美姜嫄等德  
任姒佐政內朝惠加四海草木荷恩含氣受潤庶鍾元

吉承育萬祚何圖一旦早棄明朝背絕臣庶悲痛靡告  
臣聞銘以述德誅尚及哀是以冒越諒闇之禮作誅一  
篇知不足讚揚明貴以展臣蓼莪之思憂荒情散不足  
觀采

上先帝賜鎧表

先帝賜臣鎧黑光明光各一領兩當鎧一領今代以昇  
平兵革無事乞悉以付鎧曹自理

冬至獻襪履表

伏見舊儀國家冬至獻履貢襪所以迎福踐長先臣或為之頌臣既玩其嘉藻願述朝慶千載昌期一陽嘉節四方交泰萬彙昭蘇亞歲迎祥履長納慶不勝感節情繫帷幄拜表奉賀并獻紋履七量襪若干副茅茨之陋不足以入金門登玉臺也

獻璧表

臣聞玉不隱瑕臣不隱情伏知所進非和氏之璞萬國之幣璧為克貢

獻馬表

臣於先武皇帝世得大宛紫騮一疋形法應圖善持頭尾教令習拜今輒已能又能行與鼓節相應謹以表奉獻

獻牛表

臣聞物以洪珍細亦或貴故不見焦僥之微不知泆莽之泰不見果下之乘不別龍馬之大高下相懸所以致觀也謹奉牛一頭不足追遵大小之制形少有殊敢不

獻上

請招降江東表

臣聞士之羨永生者非徒以甘食麗服宰割萬物而已  
將有以補益羣生尊主惠民使功存於竹帛名光於後  
嗣今臣文不昭於俎豆武不習於干戈而竊位藩王施  
祿東夏消損天日無益聖朝淮南尚有山竄之賊吳會  
猶有潛江之虜使戰士未獲歸於農畝五兵未得收於  
武庫蓋善論者不恥謝善戰者不羞走夫凌雲者泥蟠

者也後伸者先屈者也是以神龍以為德尺蠖以昭義  
昔湯事葛文王事犬夷固仁者能以大事小若陛下遣  
明哲之使繼能陸賈之蹤者使之江南發愷悌之詔明  
日月之信開以降路權必奉承聖化斯不疑也

請用賢表

舊集割裂審舉表蒙此之前  
名曰又請自試表今正之

昔段干木修德於閭閻秦師為之輟攻而文侯以安穰  
苴授節於邦境燕晉為之退師而景公無患皆簡德尊  
賢之所致也願陛下垂高宗傳巖之明以顯中興之功

望恩表

臣聞寒者不貪尺玉而思短褐饑者不願千金而美一餐夫千金尺玉至貴而不若一餐短褐者物有所急也  
請祭先王表

自計違遠以來有踰旬日垂竟夏節方到臣悲傷有心先王公夏至日終是以家俗不以夏日祭至於先王自可以今辰告祠臣雖卑鄙實稟體於先王自臣雖貧窶蒙陛下厚賜足供大牢之具臣欲祭先王於北河之上

羊猪牛臣能自辦者臣縣自有先王喜鰓臣前以表得  
徐州臧霸二鰓百枚足自供事請水瓜五枚計先王崩  
來未能半歲臣實欲告敬且欲復盡哀

請赴元正表

欣豫百官之美想見朝覲之禮耳存九成日想率舞

作車帳表

欲遣人到鄴市上黨布五十疋作車上小帳帷謁者不  
聽

乞田表

乞城內及城邊好田盡所賜百年力者臣雖生自至尊  
然心甘田野性樂稼穡

獵表

於七月伏鹿鳴塵四月五月射雉之際此正樂獵之時

歐冶表

昔歐冶改視鉛刀易價伯樂所盼駑馬百倍

上銀鞍表

於先武皇帝世勅此銀鞍一具初不敢乘謹奉上

謝賜穀表

詔書念臣經用不足以船河邸閣穀五千斛賜臣

章

改封陳王謝章

臣既弊陋守國無効自分削黜以彰衆誠不意天恩滂  
霈潤澤橫流猥蒙加封茅土既優爵賞必重非臣虛淺  
所宜奉受非臣灰身所能報答

封二子為公謝恩章

詔書封臣息男苗為高陽鄉公志為穆鄉公臣伏自惟  
文無升堂廟勝之功武無摧鋒接及之効天時運幸得  
生貴門遇以親戚少荷光寵竊位列侯榮曜當世顧影  
慚形流汗反側洪恩罔極雲雨增加既榮本榦枝葉并  
蒙苗志小豎既頑且稚猥荷列爵並佩金紫施崇所加  
惠及父子

書

與楊德祖書

植白數日不見思子為勞想同之也僕少小好為文章  
迄至於今二十有五年矣然今世作者可畧而言也昔  
仲宣獨步於漢南孔璋鷹揚於河朔偉長擅名於青土  
公幹振藻於海隅德璉發跡於北魏足下高視於上京  
當此之時人人自謂握靈蛇之珠家家自謂挹荆山之  
玉吾王於是設天網以該之頓八紘以掩之今悉集茲  
國矣然此數子猶復不能飛騫絕跡一舉千里也以孔

璋之才不閑於辭賦而多自謂能與司馬長卿同風譬

畫虎不成反為狗者也前有書嘲之反作論盛道僕讚

其文夫鍾期不失聽於今稱之吾亦不能妄歎者畏後

世之嗤余也世人著述不能無病僕常好人譏彈其文

有不善者應時改定昔丁敬禮嘗作小文使僕潤飾之

僕自以才不過若人辭不為也敬禮謂僕卿何所疑難

文之佳惡吾自得之後世誰相知定吾文者邪吾常歎

此達言以為美談昔尼父之文辭與人通流至於制春

秋游夏之徒乃不能措一辭過此而言不病者吾未之見也蓋有南威之容乃可以論於淑媛有龍淵之利乃可以議於斷割劉季緒才不能逮於作者而好詆訶文章掎摭利病昔田巴毀五帝罪三王咎五霸於稷下一旦而服千人魯連一說使終身杜口劉生之辯未若田氏今之仲連求之不難可無歎息乎人各有好尚蘭茝蓀蕙之芳衆人之所好而海畔有逐臭之夫咸池六莖之發衆人所共樂而墨翟有非之之論豈可同哉今往

僕少小所著辭賦一通相與夫街談巷說必有可采擊  
轅之歌有應風雅匹夫之思未易輕棄也辭賦小道固  
未足以揄揚大義彰示來世也昔揚子雲先朝執戟之  
臣耳猶稱壯夫不為也吾雖薄德位為蕃侯猶庶幾戮  
力上國流惠下民建永世之業流金石之功豈徒以翰  
墨為勲績辭賦為君子哉若吾志未果吾道不行則將  
採庶官之實錄辨時俗之得失定仁義之衷成一家之  
言雖未能藏之於名山將以傳之於同好此要之皓首

豈以今日之論乎其言之不慚恃惠子之知我也明早相迎書不盡懷曹植白

與吳質書

植白季重足下前日雖因常調得為密坐雖讌飲彌日其於別遠會稀猶不盡其勞積也若夫觴酌陵波於前簫笳發音於後足下鷹揚其體鳳觀虎視謂蕭曹不足儔衛霍不足侔也左顧右眄謂若無人豈非君子壯志哉過屠門而大嚼雖不得肉貴且快意當斯之時願舉

泰山以為肉傾東海以為酒伐雲夢之竹以為笛斬泗  
濱之梓以為箏食若填巨壑飲若灌漏卮其樂固難量  
豈非大丈夫之樂哉然日不我與曜靈急節面有逸景  
之速別有參商之濶思欲抑六龍之首頓羲和之轡折  
若木之華閉濛汜之谷天路高邈良無由緣懷戀反側  
如何如何得所來訊文采委曲擘若春榮瀏若清風申  
詠反覆曠若復面其諸賢所著文章想還所治復申詠  
之也可令憇事小吏諷而誦之夫文章之難非獨今也

古之君子猶亦病諸家有千里驥而不珍焉人懷盈尺  
和氏而無貴矣夫君子而不知音樂古之達論謂之通  
而蔽墨翟不好伎何為過朝歌而迴車乎足下好伎而  
正值墨氏迴車之縣想足下助我張目也又聞足下在  
彼自有佳政夫求而不得者日有之矣未有不求而自  
得者也且改轍易行非良樂之御易民而治非楚鄭之  
政願足下勉之而已矣適對嘉賓口授不悉往來數相

聞曹植白

與司馬仲達書

今賊徒欲保江表之城守區區之吳爾無有爭雄於宇  
內角勝於平原之志也故其俗蓋以洲渚為營壁江淮  
為城塹而已若可得挑致則吾一旅之卒足以敵之矣  
蓋弋鳥者矯其矢釣魚者理其綸此皆度彼為慮因象  
設宜者也今足下曾無矯矢理綸之謀徒欲候其離舟  
伺其登陸乃圖并吳會之地收陳野之民恐非主上授  
節將軍之心也

與陳琳書

夫披翠雲以為衣戴北斗以為冠帶虹蜺以為紳連日月以為佩此服非其美也然而帝王不服者望殊於天志絕於心矣

與丁敬禮書

頃不相聞覆相聲音亦為怪故竊興為書含欣而秉筆大笑而吐辭亦歡之極也

答崔文始書

臨江直釣不獲一鱗非江魚之不食其所餌之者非也  
是以君子慎舉擢

序

前錄自序

故君子之作也儼乎若高山勃乎若浮雲質素也如秋  
蓬擣藻也如春葩汜乎洋洋光乎皜皜與雅頌爭流可  
也余少而好賦其所尚也雅好慷慨所著繁多雖觸類  
而作然蕪穢者衆故刪定別撰為前錄七十八篇

柳頌序

予以閑暇駕言出遊過友人楊德祖之家視其屋宇寥廓庭中有一柳樹聊戲刊其枝葉故著斯文表之遺翰遂因辭勢以譏當今之士

酈生頌序

余道經酈生之墓聊駐書此文于其碑側

七

七啟

昔枚乘作七發傅毅作七激張衡作七辯崔駰作七依  
辭各美麗予有慕之焉遂作七啟并命王粲作焉

玄微子隱居大荒之庭飛遜離俗澄神定靈輕祿傲貴  
與物無營耽虛好靜羨此永生獨馳思乎天雲之際無  
物象而能傾於是鏡機子聞而將往說焉駕超野之駟  
乘追風之輿經迥漠出幽墟入乎泱泱之野遂屆玄微  
子之所居其居也左激水右高岑背洞壑對芳林冠皮  
弁被文裘出山岫之潛穴倚峻崖而嬉游志飄飄焉羗

堯馬似若狹六合而隘九州若將飛而未逝若舉翼而  
中流於是鏡機子攀葛藟而登距岳而立順風而稱曰  
予聞君子不遯俗而遺名智士不背世而滅勲今吾子  
棄道藝之華遺仁義之英耗精神乎虛廓廢人事之紀  
經譬言若畫形於無象造響於無聲未之思乎何所規之  
不通也玄微子俯而應之曰嘻有是言乎夫太極之初  
混混未分萬物紛錯與道俱隆蓋有形必朽有跡必窮  
茫茫元氣誰知其終名穢我身位累我躬竊慕古人之

所志仰老莊之遺風假靈龜以托喻寧掉尾於塗中

鏡機子曰夫辯言之艷能使窮澤生流枯木發榮庶感

靈而激神况近在乎人情僕將為君子說遊觀之至娛

演聲色之妖靡論變化之至妙敷道德之弘麗願聞之

乎玄微子曰吾子整身倦世探隱拯沈不遠遐路幸見

光臨將敬滌耳以聽玉音

鏡機子曰芳菰精稗霜蓄露葵元熊素膚肥豢膿肌蟬

翼之割割纖析微累如疊穀離若散雪輕隨風飛必不

轉切山鷄斥鷃珠翠之珍  
搴芳蓮之巢龜膾西海之飛  
鱗臙江東之潛鼉膈漢南之鳴鶉糝以芳酸甘和既醇  
玄冥適鹹蓐收調辛紫蘭丹椒施和必節滋味既殊遺  
芳射越乃有春清縹酒康狄所營應化則變感氣而成  
彈徵則苦發扣宮則甘生於是盛以翠樽酌以雕觴浮  
蟻鼎沸酷烈馨香可以和神可以娛腸此肴饌之妙也  
子能從我而食之乎玄微子曰予甘藜藿未暇此食也  
鏡機子曰步光之劍華藻繁縟飾以文犀雕以翠綠綴

以驪龍之珠錯以荆山之玉陸斷犀象未足稱雋隨波  
截鴻水不漸泐九旒之冕散曜垂文華組之纓從風紛  
紜佩則結綠懸黎寶之玳微符采照爛流景揚輝黼黻  
之服紗縠之裳金華之鳥動趾遺光繁飾參差微鮮若  
霜緄佩綢繆或彫或錯薰以幽若流芳肆布雍容閒步  
周旋馳曜南威為之解顏西施為之巧笑此容飾之妙  
也子能從我而服之乎玄微子曰予好毛褐未暇此服  
也

鏡機子曰馳騁足用蕩思遊獵可以娛情僕將為吾子  
駕雲龍之飛駟飾玉輅之繁纓垂宛虹之長綏抗招搖  
之華旂插忘歸之矢秉繁弱之弓忽躡景而輕驚逸奔  
驥而超遺風於是礮填谷塞榛藪平夷緣山置且彌野  
張罟下無漏跡上無逸飛鳥集獸屯然後會圍獠徒雲  
布武騎霧散丹旗耀野戈及皓旰曳文狐掩狡兎捐鷗  
鷄拂振鷺當軌見藉值足遇踐飛軒電逝獸隨輪轉翼  
不暇張足不及騰動觸飛鋒舉挂輕冒搜林索險探薄

窮阻騰山赴壑風厲焱舉機不虛發中必飲羽於是人稠網密地逼勢脇哮闕之獸張牙奮鬣志在觸突猛氣不懼乃使北宮東郭之儔生抽豹尾分裂羴肩形不抗手骨不隱拳批熊碎掌拉虎摧斑野無毛類林無羽羣積獸如陵飛翮成雲於是駭鐘鳴鼓收旌弛旆頰網縱網罟獠回邁駿騶齊驤揚鑿飛沫俯倚金較仰撫翠蓋雍容暇豫娛志方外此羽獵之妙也子能從我而觀之乎玄微子曰予性樂恬靜未暇此觀也

鏡機子曰閭宮顯敞雲屋皓旰崇景山之高基迎清風  
而立觀彤軒紫柱文榱華梁綺井含葩金墀玉廂溫房  
則冬服絺絺清室則中夏含霜華閣綠雲飛陞凌虛俯  
眺流星仰觀八隅升龍攀而不逮眇天際而高居繁巧  
神怪變名異形班輪無所措其斧斤離婁為之失明麗  
草交植殊品詭類綠葉朱榮熙天曜日素水盈沼叢木  
成林飛翮陵高鱗甲隱深於是逍遙暇豫忽若忘歸乃  
使任子垂釣魏氏發機芳餌沉水輕繳弋飛落翳雲之

翔鳥援九淵之靈龜然後採菱華擢水蘋弄蛛蟀戲鮫  
人諷漢廣之所詠覲遊女於水濱耀神景於中沚被輕  
縠之織羅遺芳烈而靜步抗皓首而清歌歌曰望雲際  
兮有好仇天路長兮往無由佩蘭蕙兮為誰修嫵婉絕  
兮我心愁此宮館之妙也子能從我而居之乎玄微子  
曰予耽巖穴未暇此居也

鏡機子曰既遊觀中原逍遙閒宮情放志蕩淫樂未終  
亦將有才人妙妓遺世越俗揚北里之流聲紹陽阿之

妙曲爾乃御文軒臨洞庭琴瑟交揮左篪右笙鐘鼓俱  
振簫管齊鳴然後姣人乃被文縠之華袿振輕綺之飄  
飊戴金搖之熠燿揚翠羽之雙翹揮流芳燿飛文歷盤  
鼓煥繽紛長裾隨風悲歌入雲蹻捷若飛蹈虛遠蹠陵  
躍超驤蜿蟬揮霍翔爾鴻耆戢然鳧沒縱輕體以迅赴  
景追形而不逮飛聲激塵依違厲響才捷若神形難為  
象於是為歡未潔白日西頽散樂變飾微步中閨玄眉  
弛兮鉛華落收亂髮兮拂蘭澤形媚服兮揚幽若紅顏

宜笑睇盼流光時與吾子攜手同行踐飛除即閒房華  
燭爛幄幕張動朱唇發清商揚羅袂振華裳九秋之夕  
為歡未央此聲色之妙也子能從我而遊之乎玄微子  
曰予願清虛未暇此遊也

鏡機子曰予聞君子樂奮節以顯義烈士甘危軀以成  
仁是以雄俊之徒交黨結倫重氣輕命感分遺身故田  
先伏劍於北燕公叔畢命於西秦果毅輕斷虎步谷風  
威懾萬乘華夏稱雄詞未及終而玄微子曰善鏡機子

曰此乃遊俠之徒耳未足稱妙也若夫田文無忌之儔  
乃上古之俊公子也皆飛仁揚義騰躍道藝遊心無方  
抗志雲際陵轢諸侯驅馳當世揮袂則九野生風慷慨  
則氣成虹蜺吾子若當此之時能從我而友之乎玄微  
子曰予亮願焉然方於大道有累如何

鏡機子曰世有聖宰翼帝霸世同量乾坤等曜日月玄  
化參神與靈合契惠澤播於黎苗威靈振乎無外超隆  
平於殷周踵義皇而齊秦顯朝惟清王道遐均民望如

草我澤如春河濱無洗耳之士喬嶽無巢居之民是以  
俊乂來仕觀國之光舉不遺材進各異方讚典禮於辟  
雍講文德於明堂正流俗之華說綜孔氏之舊章散樂  
移風國富民康神應休臻屢獲嘉祥故甘露紛而晨降  
景星宵而舒光觀遊龍於神淵聆鳴鳳於高岡此霸道  
之至隆而雍熙之盛際然主上猶尚以沈恩之未廣懼  
聲教之未屬采英竒於仄陋宣皇明於巖穴此審子商  
歌之秋而呂望所以投綸而逝也吾子為太和之民不

欲仕陶唐之世乎於是玄微子攘袂而興曰偉哉言乎  
近者吾子所述華淫欲以厲我祇攪予心至聞天下穆  
清明君莅國覽盈虛之正義知頑素之迷惑今予廓爾  
身輕若飛願反初服從子而歸

七咨

素冰象玉難可磨蕩結土成龍遭雨則傷

七畧

續典禮於辟雍講文德于明堂刪流俗之華談綜孔氏

之舊章

論

魏德論

元氣否塞玄黃噴薄辰星亂逆陰陽舛錯四海鼎沸蕭條沙漠武皇之興也以道陵殘義氣風發神戈退指則妖氛順制靈旗一舉則朝陽播越惟我聖后神武蓋天威光佐掃辰彗北蠻首尾爭擊氣齊率然乃電北席卷千里隱乎若崩嶽盱乎若潰海愠彼蠻夏蠢爾弗恭脂

我蕭斧簡武練鋒星陳而天運振耀乎南封荆人風靡  
交益影從軍蘊餘勢襲利乘權蕩鬼區於白水摘矯制  
乎遐川仰屬目於條支晞弱水之潺湲薄張騫於大夏  
笑驃騎於祁連其化之也如神其養之也如春柔遠能  
邇誰敢不賓憲度增飾日曜月光跡存乎建安道隆乎  
延康於是漢氏歸義顧音孔昭顯禪天位希唐效堯上  
猶謙謙弗納也發不世之明詔薄皇居而弗泰蹈北人  
之清節美石戶之高介義貫金石神明已興神祇致祥

乾靈効祐於是羣公卿士功臣列辟率爾而進曰昔文  
王三分居二以服事殷非能之而弗欲蓋欲之而弗能  
况天網弗禁皇網圮紐侯民非復漢萌尺土非復漢有  
故武皇創迹於前陛下先美於後蓋所謂勲成於彼位  
定於此者也將使斯民播秬鬯植靈芝鋤岐穗挹醴滋  
遂乃凱風回焱甘露匝時農夫詠於田隴織婦欣而綜  
絲黃吻之盍含哺而怡鮎背之老擊壤而嬉古雖稱乎  
赫胥曷若斯之大治乎於時上富於春秋聖德汪濊奇

志妙思神鑒靈察方將審御陰陽爭耀日月極禎祥於  
遐奧飛仁風以樹惠既遊精於萬機探幽洞深復逍遙  
乎六藝兼覽儒林抗思乎文藻之場圓容與乎道術之  
疆畔超天路而高峙階清雲以妙觀將參跡於三皇豈  
徒論功於大漢天地位矣九域清矣皇化四達帝猷成  
矣明哉元首股肱貞矣禮樂既作典頌聲矣固封泰山  
禪梁甫歷名山以祈福周五方之靈宇越八九於往素  
踵帝王之靈矩流餘祚於黎烝鍾元吉乎聖主

漢二祖優劣論

有客問予曰夫漢二帝高祖光武俱為受命撥亂之君  
比時事之難易論其人之優劣孰者為先予應之曰昔  
漢之初典高祖因暴秦而起遂誅強楚光有天下功齊  
湯武業流後嗣誠帝王之元勳人君之盛事也然而名  
不繼德行不純道身沒之後崩亡之際果令凶婦肆醜  
酷之心嬖妾被人豕之刑亡趙幽囚禍殃骨肉諸呂專  
權社稷幾移凡此諸事豈非高祖寡計淺慮以致然彼

之雄材大畧倣儻之節信當世至豪健壯傑士也又其  
梟將畫臣皆古今之鮮有歷世之希覩彼能任其才而  
用之聽其言而察之故兼天下有帝位流巨勲而遺元  
功也世祖體乾靈之休德稟貞和之純精通黃中之妙  
理韜亞聖之懿才其為德也通達而多識仁智而明恕  
重慎而周密樂施而愛人值陽九無妄之世遭炎光厄  
會之運殷爾雷發赫然神舉用武畧以攘暴興義兵以  
掃殘神光前驅威風先逝軍未出於南京莽已斃於西

都夫其蕩滌凶穢勦除醜類若順迅風而縱烈火曬白日而掃朝雲也爾乃廟勝而後動衆計定而後行師故攻無不陷之壘戰無奔北之卒是以羣下欣欣歸心聖德宣仁以和衆邁德以來遠故實融聞聲而影附馬援一見而歎息股肱有濟濟之美元首有穆穆之容敦睦九族有唐虞之稱高尚純樸有羲皇之素謙虛納下有吐握之勞留心庶事有日昃之勤乃規弘跡而造皇極創帝道而立德基是以計功則業殊比隆則事異旌德

則靡愆言行則無穢量力則勢微論輔則力劣卒能握  
乾圖之休徵應五百之顯期立不刊之遐迹建不朽之  
元功金石播其休烈詩書載其勲懿故曰光武其優也

成王漢昭論

周公以天下初定武王既終而成王尚幼未能定南面  
之事是以推以忠誠稱制假號二弟流言召公疑之發  
金縢之匱然後用寤亦未決也至於昭帝所以不疑於  
霍光亦緣武帝有遺詔於光使光若周公踐天子之位

行周公之事吾恐叛者非徒二弟疑者非徒召公也且  
賢者固不能知聖賢自其宜耳昭帝固不可疑霍光周  
王自疑周公也若以昭帝勝成王霍光當踰周公邪若  
以堯舜為成王湯禹作管蔡邵公周公之不見疑必也

相論

世固有人身瘠而志立體小而名高者於聖則否是以  
堯眉八彩舜目重瞳禹耳參漏文王四乳然則世亦有  
四乳者此則駑馬一毛似驥耳宋臣有公孫呂者長七

尺面長三尺廣三寸若此之狀蓋遠代而求非一世之異也使形殊於外道合其中名震天下不亦宜乎語云無憂而戚憂必及之無慶而歡樂必隨之此心有先動而神有先知則色有先見也故扁鵲見桓公知其將亡申叔見巫臣知其竊妻而逃也

辯道論

世有方士吾王悉所招致甘陵有甘始廬江有左慈陽城有卻儉始能行氣導引慈曉房中之術儉善辟穀悉

號三百歲卒所以集之於魏國者誠恐斯人之徒接姦  
究以欺衆行妖慝以惑民豈復欲觀神仙於瀛洲求安  
期於海島釋金輅而履雲輿棄六驥而美飛龍哉自家  
王與太子及余兄弟咸以為調笑不信之矣然始等知  
上遇之有恒奉不過於員吏賞不加於無功海島難得  
而遊六轍難得而佩終不敢進虛誕之言出非常之語  
余嘗試卻儉絕穀百日躬與之寢處行步起居自若也  
夫人不食七日則死而儉乃如是然不必益壽可以療

疾而不憚饑饉焉左慈善修房內之術差可終命然自非有志至精莫能行也甘始者老而有少容自諸術士咸共歸之然始辭繁寡實頗有怪言余常辟左右獨與之談問其所行溫顏以誘之美辭以導之始語余吾本師姓韓字世雄嘗與師於南海作金前後數四投數萬斤金於海又言諸梁時西域胡來獻香罽腰帶割玉刀時悔不取也又言車師之西國兒生擘背出脾欲其食少而努行也又言取鯉魚五寸一雙合其一煮藥俱投

沸膏中有藥者奮尾鼓鯁游行沉浮有若處淵其一者  
已熟而可噉余時問言率可試不言是藥去此逾萬里  
當出塞始不自行不能得也言不盡於此頗難悉載故  
粗舉其巨怪者始若遭秦始皇漢武帝則復為徐福藥  
大之徒也夫帝者位殊萬國富有天下威尊彰明齊光  
日月宮殿闕庭等曜紫微何顧乎王母之宮崑崙之域  
哉夫三鳥備役不如百官之美也素女姮娥不若椒房  
之麗也雲衣羽裳不若黼黻之飾也駕螭載霓不若乘

輿之盛也瓊藥玉華不若玉圭之潔也而顧為匹夫所  
罔納虛妄之辭信眩惑之說隆禮以招弗臣傾產以供  
虛求散王爵以榮之清閒館以居之經年累稔終無一  
驗雖復誅其身滅其族紛然足為天下笑矣若夫玄黃  
所以娛目鏗鏘所以樂耳媛妃所以紹先芻豢所以說  
口也何必甘無味之味聽無聲之樂觀無采之色乎

又辯道論

此篇出廣弘明集只數語與魏志及  
舊集畧同餘文俱不載今另存之

夫神仙之書道家之言乃云傳說上為辰尾宿歲星降

為東方朔淮南王安誅於淮南而謂之獲道輕舉鉤弋  
死於雲陽而謂之屍逝樞空其為虛妄甚矣哉中興篤  
論之士有桓君山者其所著述多善劉子駿嘗問人言  
誠能抑嗜欲闔耳目可不哀竭乎時庭中有一老榆君  
山指而謂曰此樹無情欲可忍無耳目可闔然猶枯槁  
腐朽而子駿乃言可不哀竭非談也君山援榆喻之未  
是也何者余前為王莽典樂大夫樂記云文帝得魏文  
侯樂人竇公年百八十兩目盲帝竒而問之何所施行

對曰臣年十三而失明父母哀其不及事教臣鼓琴臣  
又能導引不知壽得何力君山論之曰頗得少盲專一  
內視情不外鑒之助也先難子駿以內視無益退論實  
公便以不鑒證之吾未見其定論也君山又曰方山有  
董仲君者繫獄佯死數日日陷蟲出死而復生然後竟  
死生之必死君子所達夫何喻乎夫至神不過天地不  
能使蟄蟲夏潛震雷冬發時變則物動氣移而事應彼  
仲君者乃能藏其氣屍其體爛其膚出其蟲無乃大怪

乎世有方士吾王悉所招致甘陵有甘始廬江有左慈  
陽城有邽儉始能行氣導引慈曉房中之術儉善辟穀  
悉號三百歲本所以集之於魏國者誠恐斯人之徒接  
姦詭以欺衆行妖隱以惑人故聚而禁之甘始者老而  
有少容自餘術士咸共歸之然始詞繁寡寔頗竊有怪  
言若遭秦始皇漢武帝則復徐福樂大之徒矣桀紂殊  
世而齊惡姦人異代而等偽乃如此邪又世虛然有仙  
人之說仙人者儻孫爰之屬與世人得道化為仙人

乎夫雉入海為蜃燕入海為蛤當夫徘徊其翼差池  
其羽猶自識也忽然自投神化體變乃更與龜鼈為  
羣豈復自識翔林薄巢垣屋之娛乎而顧為匹夫所  
調納虛妄之詞信眩惑之說隆禮以招弗臣傾產以  
供虛求散王爵以祭之清閑館以居之經年累稔終  
無一效或歿於沙丘或崩乎五柞臨時雖誅其身滅  
其族紛然足為天下笑矣然壽命長短骨體強劣各  
有人焉善養者終之勞擾者半之虛用者歿之其斯

之謂歟

令禽惡鳥論

國人有以伯勞生獻者王召見之侍臣曰世人同惡伯勞之鳴敢問何謂也王曰昔尹吉甫用後妻之說殺孝子伯竒吉甫後悟追傷伯竒出遊於田見鳥鳴於桑見其聲噉然吉甫動心曰伯勞乎乃撫翼其音尤切吉甫乃顧謂曰伯勞乎是吾子棲吾輿非吾子飛勿居鳥尋聲而棲於蓋吉甫遂射殺後妻以謝之故俗惡伯勞之

鳴言所鳴之家必有尸也此好事者附名為之說而今  
普傳惡之斯實否也伯勞以五月而鳴應陰氣之動陰  
為賊害蓋賊害之鳥也其聲鴟鴞然故俗憎之若其為  
人灾害愚民之所信通人之所畧也鳥鳴之惡自取憎  
人言之惡自取滅不有能累於當世也而凶人之行弗  
可易梟鳥之鳴不可更者天性然也昔荆人之梟將巢  
於吳鳩遇之曰何去荆而巢吳乎梟曰荆人惡子之聲  
鳩曰子不能革子之音則吳楚之民不異情也為子計

者莫若宛頸戢翼終身勿復鳴也昔會朝議者有人問曰寧有聞臬食其母乎有答之者曰嘗聞烏反哺未聞臬食母也問者慙唱不善也得螿者莫不訓而放之為利人也得蚤者莫不糜之齒牙為害身也鳥獸昆蟲猶以名聲見異况夫吉士之與凶人乎

仁孝論

且禽獸悉知愛其母知其孝也唯白虎通騏驎稱仁獸者以其明盛哀知治亂也孝者施近仁者及遠

輔臣論

蓋精微聽察理析毫分規矩可則阿保不傾群言系于口而研撫是非典謨總乎心而唯所用之者鍾太傅也清素寡欲明敏特達志存太虛安心玄妙處平則以和養德遭變則以斷蹈義華太尉歆之謂也

文武並亮權智時發奢不過制儉不損禮入毗皇家帝之股肱出則侯伯實撫東夏者曹大司馬也

辨博通幽見傳異慶德實充塞于內知謀縱橫于外解

疑釋滯剖散盤錯王司徒也

至德純粹進吐善謀者陳司空也

智慮深奧淵然難測執節平敵中表條暢恭以奉上愛  
以接下納言左右為帝喉舌曹大將軍也

魁傑雄特秉心平直威嚴足憚風行草靡我昭果毅折  
衝厭難者司馬驃騎也

征蜀論

今將以謀謨為劍戟以策畧為旌旗

又云下畧成雷棒殘木碎

魏德論畧

孟春之且從太陽方貴放鳥雀者加其祿也得者莫不  
馴而放之為利人也得蚤者莫不靡之齒牙為害身也  
說

藉田說

昔者神農氏始嘗萬草教民種植今寡人之興此田將  
欲以擬乎治國非徒娛耳目而已也夫營疇萬畝厥田  
上下經以大陌帶以橫阡此亦寡人之封疆也日殄沒

而歸館晨未昕而即野此亦寡人之先下也菽藿特疇  
禾黍異田此亦寡人之政理也及其息沸涌庇重陰懷  
有虞撫素琴此寡人之所習樂也蘭蕙荃蘅植之近疇  
此亦寡人之所親賢也藜蓬臭蔚棄之乎遠疆此亦寡  
人之所遠佞也若年豐歲登果茂菜滋則臣僕小人咸  
取驗焉

又

封人有能以輕鑿修鉤去樹之蝸者樹得以繁茂中舍

人曰不識治天下者亦有蝎乎寡人告之曰昔三苗共  
工繇驩堯非堯之蝎與問曰諸侯之國亦有蝎乎寡人  
告之曰齊之諸田晉之六卿魯之三桓非諸侯之蝎與  
然三國無輕鑿修鉤之任終於齊篡魯弱晉國以分不亦痛  
乎曰不識為君子者亦有蝎乎寡人告之曰固有之也富  
而慢貴而驕殘仁賊義甘財悅色亦君子之蝎乎天子  
勤耘以收一國大夫勤耘以收世祿君子勤耘以顯令  
德夫農者始於種終於穫澤既時矣苗既美矣棄而不

耘則故為荒疇蓋豐年者期於必收譬修道亦期於沒身也

髑髏說

曹子遊乎陂塘之濱步乎蓁穢之藪蕭條潛虛經幽踐阻顧見髑髏塊然獨居於是伏軾而問之曰子將結纓首劍殉國君乎將被堅執銳斃三軍乎將嬰茲固疾命隕傾乎將壽終數極歸幽冥乎叩遺骸而歎息哀白骨之無靈慕嚴周之適楚儻託夢以通情於是倅若有來

恍若有存影見容隱厲聲而言曰子何國之君子乎既  
枉輿駕愍其枯朽不惜咳唾之音慰以若言子則辯於  
辭矣然未達幽冥之情死生之說也夫死之為言歸也  
歸也者歸於道也道也者身以無形為主故能與化推  
移陰陽不能更四時不能虧是故洞於纖微之域通於  
恍惚之庭望之不見其象聽之不聞其聲挹之不充注  
之不盈吹之不凋嘘之不榮激之不流凝之不停寥落  
冥漠與道相拘偃然長寢樂莫是踰曹子曰予將請之

上帝求諸神靈使司命輟籍反子骸形於是髑髏長呻  
廓然歎曰甚矣何子之難語也太素氏不仁勞我以形  
苦我以生今也幸變而之死是反吾真也何子之好勞  
而我之好逸子則行矣子將歸於太虛於是言卒響絕  
神光霧除顧將旋軫乃命僕夫拂以玄塵覆以縞巾爰  
將藏彼路濱覆以丹土翳以綠榛夫存亡之異世乃宣  
尼之所陳何神憑之虛對云死生之必均

畫說

觀畫者見三皇五帝莫不仰戴見三季暴主莫不悲宛  
見篡臣賊嗣莫不切齒見高節妙士莫不忘食見忠節  
死難莫不抗首見忠臣孝子莫不歎息見淫夫妬婦莫  
不側目見令妃順后莫不嘉貴是知存乎鑒者何如也

說疫氣

建安二十二年癘氣流行家家有僵尸之痛室室有號  
泣之哀或闔門而殮或覆族而喪或以為疫者鬼神口  
作夫罹此者悉被褐茹藿之子荆室蓬戶之人耳若夫

殿處鼎食之家重貂累蓐之門若是者鮮焉此乃陰陽失位寒暑錯時是故生疫而愚民懸符厭之亦可笑也

又

鹹水之魚不遊于江淡水之魚不入于海

謳

魏德論謳

甘露

玄德洞幽飛化上承甘露以降密淳水凝觀陽弗晞瓊

爵是承獻之帝朝以明賈徵

連理木

皇樹嘉德風靡雲披有木連理別幹同枝將承大同應  
天之規

穀

於穆聖皇仁暢惠渥辭獻減膳以服鰥獨和氣致祥時  
雨洒沃野草萌芽變化嘉穀

禾

猗猗嘉禾惟穀之精其洪盈箱協穗殊莖昔生周朝今  
植魏庭獻之朝堂以昭祖靈

鵲

鵲之疆疆詩人取喻今存聖世呈質見素饑食苔華渴  
飲清露異於儔匹衆鳥是驚

鳩

班班者鳩爰素其質昔翔殷邦今為魏出朱目丹趾靈  
姿詭類載飛載鳴彰我皇懿

碑

制命宗聖侯孔羨奉家祀碑

維黃初元年大魏受命肩軒轅之高蹤紹虞氏之遐統  
應歷數以改物揚仁風以作教於是輯五瑞班宗彛鈞  
衡石同度量秩羣祀於無文順天時以布化既乃緝熙  
聖緒紹顯上世追存三代之禮兼紹宣尼之後以魯縣  
百戶命孔子二十一世孫議郎孔羨為宗聖侯以奉孔  
子之祀制詔三公曰昔仲尼負大聖之才懷帝王之器

當哀周之末而無受命之運在魯衛之朝教化洙泗之上栖栖焉皇皇焉欲屈己以存道貶身以救世於是王公終莫能用之乃退考五代之禮修素王之事因魯史而制春秋就太師而正雅頌俾千載之後莫不宗其文以述作仰其聖以謀咨可謂命世大聖億載之師表者也遭天下大亂百祀墮壞舊居之廟毀而不修褒成之後絕而莫繼闕里不聞講誦之聲四時不睹蒸嘗之位斯豈所謂崇禮報功盛德必百世祀者哉嗟乎朕甚憫

焉其以議郎孔羨為宗聖侯邑百戶奉孔子之祀今魯  
郡修起舊廟置百戶卒吏以守衛之又於其外廣為屋  
宇以居學者於是魯之父老諸生遊士睹廟堂之始復  
觀俎豆之初設嘉聖靈於髣髴想禎祥之來集乃慨然  
而歎曰大道衰廢禮樂絕滅三十餘年皇上懷仁聖之  
懿德兼二儀之化育廣大包於無方淵深淪於不測故  
自受命以來天人咸和神氣氤氳嘉瑞踵武休徵屢臻  
殊俗解編髮而慕義遐夷越險阻而來賓雖太皞遊龍

以君世虞氏儀鳳以臨民伯禹命玄宮而為夏后西伯  
由岐社而為周文尚何足稱於大魏哉若乃紹繼微絕  
興修廢官疇咨稽古崇配乾坤况神明之所福作宇宙  
之所觀欣欣之色豈徒魯邦而已哉爾乃感殷人路寢  
之義嘉先民泮宮之事以為高宗僖公蓋嗣世之王諸  
侯之國耳猶著德於三頌騰聲於千載况今聖皇肇造  
區夏創業垂統受命之日曾未下輿而褒美大聖隆化  
如此能無頌乎乃作頌曰

煌煌大魏受命溥將繼體黃唐  
色夏含商降釐下土廓清三光  
羣祀咸秩靡事不綱嘉彼玄聖  
有赫其靈遭世霧亂莫顯其榮  
褒成既絕寢廟斯傾闕里蕭條  
靡韶馨我皇悼之尋其世武乃  
建宗聖以紹厥後修復舊堂豐  
其甍宇莘莘學徒爰居爰處王教  
既新羣小遄沮魯道以興永作  
憲矩洪聲豈遐神祇來和休徵  
雜遝瑞我邦家內光區域外被  
荒遐殊方慕義搏拊揚歌於赫  
四聖運世應期仲尼既没文亦  
在茲彬彬我后越而五之

垂於億載如山之基

頌

皇子生頌

於我聖后憲章前志克纂二皇三靈昭事祇肅郊廟明德敬惠陽和積吉鍾天之釐嘉月令辰篤生聖嗣慶由一人萬國作喜喁喁萬國岌岌羣生稟命我后綏之則榮長為臣妾終天之經仁聖奕代永載明明同年上帝休祥淑禎藩臣作頌光流德聲吁嗟卿士祇承予聽

承露盤頌

有序一作銘

皇帝鑄承露盤莖長十二丈大十圍上盤逕四尺下盤逕五尺銅龍遶其根龍身長一丈背負兩子自立於芳林園甘露乃降使臣為頌頌曰

岌岌承露峻極太清神若礪硯洪基嶽停下潛醴泉上受雲英和氣四充翔風所經匪我明后孰能經營近歷纏度三光朗明珠俗歸義祥瑞混并鸞鳳晨棲甘露宵零神物攸協高而不傾奉天戴巍恭統神器固若露盤

長存永貴賢聖繼跡奕世明德不忝先功保茲皇極垂  
作億兆永荷天秩

孔廟頌

有序

自五帝典絕三皇禮廢應期命世齊賢等聖者莫高於  
孔子也故有若曰出乎類拔乎萃誠所謂性與天道不  
可得而聞矣

由也務學名在前志宰子晝寢糞土作誠過庭子弟詩  
禮明記歌以詠言文以騁志予今不述后賢曷識於鑠

尼父生民之傑性與天成該聖備藝德倫三五配皇作  
烈玄鏡獨鑑神明昭晰仁塞宇宙志凌雲霓學者三千  
莫不俊乂唯仁是憑唯道足恃鑽仰彌高請益不已

舊集

摘宗聖侯碑頌中數語作孔子  
頌更名此篇為學宮頌今正之

社頌 有序

余前封郵城侯轉雍丘皆欲為上宅宇初造以府庫尚  
豐志在善公夫務完圃而已農桑一無所營經離十載  
瑰然守空饑寒備嘗聖朝愍之故封此縣田則一州之

膏腴桑則天下之甲第故封此桑以為田社乃作頌云  
於惟太社官名后土是曰勾龍功著上古德配帝王實  
為靈主克明播植農正日舉尊以作稷豐年是與義與  
社同方神北宇建國承家莫不攸叙

湯妃頌

殷湯令妃有莘之女仁教內修度儀以處清謚后宮九  
嬪有序伊為媵臣遂作元輔

姜后頌

於鑠姜后光配周宣非禮不動非禮不言晏起失朝永  
巷告愆王用勤政萬國以虔

玄俗頌

玄俗妙識饑餌神頴在陰倏逝即陽無景逍遙北嶽凌  
霄引領揮霧昊天含神自靜

冬至獻襪頌

玉趾既御履和蹈貞行與祿邁動以祥并南闕北戶西  
巡王城翺翔萬域聖體浮輕

宜男花頌

草號宜男既曄且貞其貞伊何惟乾之嘉其曄伊何綠  
葉丹花光采晃曜配彼朝日君子耽樂好和琴瑟固作  
螽斯惟立孔臧福濟太妣永世克昌

贊

畫贊

蓋畫者鳥書之流昔明德馬后美於色厚於德帝用嘉  
之嘗從觀畫過虞舜廟見娥皇女英帝指之戲后曰恨

不得如此為妃又前見陶唐之像后指堯曰嗟乎群臣  
百寮恨不得為君如是帝顧而笑故夫畫所見多矣

庖犧贊

木德風姓八卦創焉龍瑞名官法地象天庖厨祭祀網  
罟魚畋瑟以像時神德通玄

女媧贊

古之國君造篁作笙人物未就軒轅纂成或云二皇人  
首蛇形神化七十何德之靈

神農贊

少典之胤火德承木造為耒耜導民播穀正為雅琴以  
暢風俗

黃帝贊

少典之孫神明聖哲土德承火赤帝是滅服牛乘馬衣  
裳是制氏雲名官功冠五帝

黃帝三鼎贊

鼎質之精古之神器黃帝是鑄以像太乙能輕能重知

凶讖吉世哀則隱世和則出

少昊贊

祖自軒轅青陽之裔金德承土儀鳳帝世官鳥號名殊  
職別系農正扈氏各有品制

顓頊贊

昌意之子祖自軒轅始誅九黎水德統天以國為號風  
化神宣威暢八極靡不祇虔

帝嚳贊

卷二十一  
祖自軒轅玄囂之裔生言其名木德帝世撫寧天地神  
聖靈察教弭四海明並日月

帝堯贊

火德統位父則高辛克平共工萬國同塵調適陰陽其  
惠如春巍巍成功配天則神

帝舜贊

顓頊之族重瞳神聖克協頑瞽應唐涖政除凶舉俊以  
齊七政應歷受禪顯天之命

夏禹贊

吁嗟天子拯世濟民克卑宮室致孝鬼神蔬食薄服黻  
冕乃新厥德不回其誠可親疊疊其德溫溫其仁尼稱  
無間何德之純

禹治水贊

嗟夫夏禹實勞水功西鑿龍門疏河道江梁岐既闢九  
州以同天錫玄圭奄有萬邦

禹渡河贊

禹濟於河黃龍負船舟人並懼禹歎仰天子授大運動  
功恤民死亡命也龍乃弭身

殷湯贊

殷湯伐夏諸侯振仰放桀鳴條南面以王桑林之禱炎  
災克償伊尹佐治可謂賢相

湯禱桑林贊

惟殷之世炎旱七年湯禱桑林祈福於天剪髮離爪自  
以為牲皇靈感應時雨以零

周文王贊

於赫聖德寔惟文王三分有二猶服事商化加虞芮傍  
開四方王業克昭武嗣遂光

周文王赤雀贊

西伯積德天命攸顧赤雀銜書爰集昌戶瑞為天使和  
氣所致嗟爾後王昌期而至

周武王贊

桓桓武王繼世滅殷咸任尚父且作商臣功冒四海救

世濟民天下宗周萬國是賓

周公贊

成王即位年尚幼稚周公居攝四海慕利罰叛柔服祥  
應仍至誦長反政達天忠義

周成王贊

成王繼武聖賢保傳年雖幼稚岐嶷有素初疑周公終  
馬克寤旦夷佐治遂致刑錯

漢高帝贊

屯雲斬蛇靈母告祥朱旗既抗九野披攘禽嬰克羽掃  
滅英雄承機帝世功著武湯

漢文帝贊

孝文即位愛物儉身驕吳撫越匈奴和親納諫赦罪以  
德讓民殆至刑錯萬國化淳

漢景帝贊

景帝明德繼文之則肅清王室克滅七國省役薄賦百  
姓殷昌風移俗易齊美成康

漢武帝贊

世宗光充文武是攘威振百蠻恢拓土疆簡定律歷辯  
修舊章封天禪土功越百王

姜嫄簡狄贊

嚳有四妃子皆為王帝摯且崩堯承天綱元鳥大跡殷  
周美祥稷契既生翊化虞唐

禹妻贊

禹娶塗山土功是急聞啟之生過門不入女嬌達義明

勲是執成長聖嗣天祿以襲

班婕妤好贊

有德有言實惟班婕妤盈冲其驕窮其厭悅在夷貞艱在  
晉正接臨飈端幹衝霜振葉

吹雲贊

天地變化是生神物吹雲吐潤浮氣翁鬱

巢父贊

堯禪許由巢父是耻穢其溷聽臨河洗耳池主是讓以

水為濁嗟此三士清足厲俗

務光贊

湯將伐桀謀於卞子既聞讓位隨以為耻薄於殷世著  
自汙已自投潁水清風邈矣

商山四皓贊

嗟爾四皓避秦隱形劉項之爭養志弗營不應朝聘保  
節全貞應命太子漢嗣以寧

長樂觀畫贊

妙哉平生才巧若神辭賦之作華若望春

古冶子等贊

齊姜接子勇節狗名虎門之博忽晏置釁矜而日伐輕  
死重分

銘

寶刀銘

造茲寶刀既礮既礪匪以尚武予身是衛麟角是觸鸞  
距匪蹶

承露盤銘

并序

明帝鑄承露盤莖長十二丈大十圍上盤逕四尺下盤  
逕五尺銅龍遶其根龍身長一丈背負兩子自立於芳  
林園甘露乃降使臣為頌銘銘曰

峒峒承露峻極太清神君礪魄洪基嶽停下潛醴泉上  
受雲英和氣四充翔風所經匪我明君孰能經營近歷  
纏度三先朗明殊俗歸義祥瑞混并鸞鳳晨棲甘露宵  
零神物攸協高而不傾奉天戴巍恭統神器因若露盤

長存永貴賢聖繼跡奕世明德不忝先功保茲皇極垂  
作億兆永荷天秩

文

誥咎文

有序

五行致災先史咸以為應政而作天地之氣自有變動  
未必政治之所興致也於時大風發屋拔木意有感焉  
聊假天帝之命以誥咎祈福辭曰

上帝有命風伯雨師夫風以動氣雨以潤時陰陽協和

氣物以滋亢陽害苗暴風傷條伊周是遇在湯斯遭桑  
林既禱慶雲克舉偃禾之復姬公去楚况我皇德承天  
統民禮敬川嶽祈肅百神享茲元吉釐福日新至若炎  
旱赫羲颺風扇發嘉卉以萎良木以拔何谷宜填何山  
應伐何靈宜論何神宜謁於是五靈振悚皇祇赫怒招  
搖驚怯攬搶奮斧河伯典澤屏翳司風迴呵飛廉顧叱  
豐隆息颺遏暴元勅華嵩慶雲是興效厥年豐遂乃沈  
陰坱圠甘澤微微雨我公田爰暨於私黍稷盈疇芳草

依依靈禾重穗生彼邦畿年登歲豐民無餒饑

釋愁文

予以愁慘行吟路邊形容枯悴憂心如醉有玄靈先生見而問之曰子將何疾以至於斯答曰吾所病者愁也先生曰愁是何物而能病子乎答曰愁之為物惟恍惟惚不名自來推之弗往尋之不知其際握之不盈一掌寂寂長夜或羣或黨去來無方亂我情爽其來也難退其去也易追臨餐困於哽咽煩冤毒於酸嘶加之以粉

飾不澤飲之以兼肴不肥溫之以金石不消麾之以神膏不希授之以巧笑不悅樂之以絲竹增悲醫和絕思而無措先生豈能為我著龜乎先生作色而言曰予徒辯子之愁形未知子愁所由而生我獨為子言其發矣方今大道既隱子生末季沉溺流俗眩惑名位濯纓彈冠諂趣榮貴坐不安席食不終味遑遑汲汲或憔悴所鬻者名所拘者利良由華薄凋損正氣吾將贈子以無為之藥給子以淡薄之湯刺子以玄虛之針灸子以

淳朴之方安子以恢廓之宇坐子以寂寞之床使王喬  
與子遨遊而逝黃公與子詠歌而行莊子與子具養神  
之撰老聃與子致愛性之方趣避路以棲跡乘輕雲以  
翱翔於是精駭魂散改心回趣願納至言仰崇玄旨衆  
愁忽然不辭而去

誄

武帝誄

於惟我王乘運之哀神武震發羣雄戡夷拯民於下登

帝太徽德美且爽功越彭韋九德先被萬國作師寢疾  
不興聖體長違華夏飲淚黎庶含悲神翳功顯身沈名  
飛敢揚聖德表之素旗乃作誄曰

於穆我王胄稷肩周賢聖是紹元懿允休先侯佐漢實  
維平陽功成績著德昭二皇民以寧一興詠有章我王  
承統天姿特生年在志學謀過老成奮臂舊邦翻身上  
京表與我王兵交若神張陳背誓傲帝虐民擁徒百萬  
虎視朔濱我王赫怒戎車列陳武卒虓闕如雷如震攬

搶北掃舉不決辰紹遂奔北河朔是賓振旅京師帝嘉  
厥庸乃位丞相摠攝三公光受上爵君臨魏邦九錫昭  
備大路火龍玄鑑靈察探幽洞微下無偽情姦不容非  
敦儉尚古不玩珠玉以身先下民以純樸聖性嚴毅平  
修清一惟善是嘉靡疏靡昵怒過雷霆喜踰春日萬國  
肅虔望風震慄既摠庶政兼覽儒林窮著雅頌被之瑟  
琴茫茫四海我王康之微微漢嗣我王匡之羣傑扇動  
我王服之喁喁黎庶我王育之光有天下萬國作君虔

奉本朝德美周文以寬克衆每征必舉四夷賓服功夷  
聖武翼帝王世神武鷹揚左鉞右旄威凌伊呂年踰耳  
順體愉志肅乾乾庶事氣過方叔宜並南嶽君國無窮  
如何不弔禍鍾聖躬棄離臣子背世長終兆民號咷仰  
懇上穹既以約終令節不衰既即梓宮躬御綴衣璽不  
存身唯紼是荷明器無飾陶素是嘉既次西陵幽閨啟  
路羣臣奉迎我王安厝窈窕玄宇三光不晰幽闈一扃  
尊靈永蟄聖上臨穴哀號靡及羣臣陪臨佇立以泣去

此昭昭於彼冥冥永棄兆民下君百靈千代萬乘曷時  
復形

文帝誄

惟黃初七年五月七日大行皇帝崩嗚呼哀哉於時天  
震地駭崩山隕霜陽精薄景五緯錯行百姓吁嗟萬國  
悲悼若喪考妣恩慕過唐擗踊郊塗仰想穹蒼僉曰何  
辜早世隕喪嗚呼哀哉悲夫大行忽焉光滅永棄萬民  
雲往雨絕承問慌惚惛懵哽咽袖鋒抽刃欲自僵斃追

慕三良甘心同穴感彼南風惟以鬱滯終於偕沒指景  
自誓考諸先紀尋之哲言生若浮寄惟德可論朝聞夕  
逝孔志所存皇雖殪歿天祿永延何以述德表之素旃  
何以詠功宣之管絃乃作誄曰

皓皓太素兩儀始分中和產物肇有人倫爰暨三皇實  
秉道真降逮五帝繼以懿純三代製作踵武立勲季嗣  
不維網漏於秦崩樂滅學儒坑禮焚二世而殲漢氏乃  
因弗求古訓羸政是遵王綱帝典閭爾無聞末光幽昧

道究運遷乾坤回歷簡聖授賢乃眷大行屬以黎元龍  
飛啟祚合契主玄正行定紀改號革年明明赫赫受命  
於天風偃物化德以禮宣祥惟聖質岐嶷幼齡研幾六  
典學不過庭潛心無妄亢志清冥才秀藻朗如玉之瑩  
聽察無響瞻睹未形其剛如金其貞如瓊如水之潔如  
砥之平爵功無重戮違無輕心鏡萬機鑒照下情思良  
股肱嘉昔伊呂搜揚側陋舉湯代禹拔才巖穴取士蓬  
戶唯德是縈弗拘禰祖宅土之中道義是圖弗營厥險

六合是虞齊契共檢導下以純恢拓規矩克紹前人科  
條品制褒貶以因乘殷之輅行夏之辰金根黃屋翠葆  
龍鱗紉冕崇麗衡紃維新尊肅禮容矚之若神方牧妙  
舉欽於恤民虎將荷節鎮彼四隣朱旗所勦九壤被震  
疇克不若孰敢不臣縣旌海表萬里無塵虜備凶徹烏  
殪江岷摧若涸魚乾腊矯鱗肅慎納貢越裳效珍條支  
絕域獻款內賓德濟先王功侔太古上靈降瑞黃初倣  
祜河龍洛龜陵波遊下平均應繩神鸞翔舞數莢階除

系風扇暑皓獸素禽飛走郊野神鐘寶鼎形自舊土雲  
英甘露瀝塗被宇靈芝冒沼朱華蔭者回回凱風祁祁  
甘雨稼穡豐登我稷我黍家佩惠君戶蒙慈父圖致太  
和洽德全義將登泰山先皇作儷鐫石紀勲兼錄衆瑞  
方隆封禪歸功天地賓禮百靈勲命視規望祭四嶽燎  
封奉柴肅於南郊宗祀上帝三牲既供夏禘秋嘗元侯  
佐祭獻璧奉璋鸞輿幽謁龍旂太常爰迄太廟鐘鼓鏗  
鏘頌德詠功八佾鏘鏘皇祖既饗烈考來享神具醉止

降茲福祥天地震蕩大行康之三辰暗昧大行光之皇  
紘絕維大行綱之神器莫統大行當之禮樂廢弛大行  
張之仁義陸沉大行揚之潛龍隱鳳大行翔之疏狄遐  
康大行匡之在位七載元功仍舉將永太和絕迹三五  
宜作物師長為神主壽終金石等美東父如何奄息摧  
身后土俾我笄笄靡瞻靡顧嗟嗟皇穹胡寧忍務嗚呼  
哀哉明監吉凶體達存亡深垂典制申之嗣皇聖上虔  
奉是順是將乃創立宇基於首陽擬迹穀林追堯纂唐

合山同陵不樹不疆塗車芻靈珠玉靡藏百神警侍來  
賓幽堂耕禽田獸望魂之翔於是俟大隧之致功兮練  
元辰之淑禎潛華體於梓宮兮馮正殿以居靈顧皇嗣  
之號咷兮存臨者之悲聲悼晏駕之既往兮感容車之  
速征浮飛魂於輕霄兮就黃墟以藏形背三光之昭晰  
兮歸玄宅之冥冥嗟一往之不返兮痛悶闔之長扃咨  
遠臣之眇眇兮成凶諱以怛驚心孤絕而靡告兮紛流  
涕而交頸思思榮以橫奔兮閔闕塞之堯峯顧哀經以

輕舉兮念闕防之我嬰欲高飛而遙憇兮憚天網之遠  
經遙投骨於山足兮報恩養於下庭慨拊心而自悼兮  
懼施重而命輕嗟微軀之是效兮甘九死而忘生幾司  
命之役籍兮先黃髮而隕零天蓋高而察卑兮冀神明  
於我聽獨鬱伊而莫告兮追顧景而憐形奏斯文以寫  
思兮結翰墨以敷誠嗚呼哀哉

卞太后誄

失表

率土噴薄三光改度陵頽谷踊五行錯互皇室蕭條羽

檄四布百姓歆歔嬰兒號慕若喪考妣天下縞素聖者  
知命殉道寶名義之攸在亦棄厥生敢揚后德表之旒  
旌光垂罔極以慰我情乃作誄曰

我皇之生坤靈是輔作合於魏亦光聖武篤生文帝紹  
虞之緒龍飛紫宸奄有九土詳惟聖善岐嶷秀出德配  
姜嫄不忝先哲玄覽萬機兼才備藝汎納容衆含垢藏  
疾仰奉諸姑降接儔列陰處陽潛外明內察乃踐大位  
母養萬國溫溫其人不替明德悼彼邊氓未遑宴息恒

勞庶事兢兢翼翼親桑蠶館為天下式樊姬霸楚書載  
其庸武王有亂孔歎其功我后齊聖克暢丹聰不出房  
闔心照萬邦年踰耳順乾乾匪倦珠玉不玩躬御綈練  
日旰忘饑臨樂勿讌去奢即儉曠世作顯慎終如始蹈  
和履貞恭事神祇昭奉百靈跼天躋地祇畏神明敬微  
慎獨執禮幽冥虔肅宗廟蠲薦三牲降福無疆祝云其  
誠宜享斯祐蒙祉自天何圖凶咎不免斯年嘗禱盡禮  
有篤無痊豈命有終神食其言遺孤在疚承諱東藩擬

踊郊甸洒淚中原追號皇妣棄我何遷昔垂顧復今何  
不然空宮寥廓棟宇無煙巡省階塗髣髴軒仰瞻帷  
幄俯察几筵物不毀故而人不存痛莫酷斯彼蒼者天  
遂臻魏都游魂舊邑大隧開塗塗靈魄斯戢歎息霧興揮  
淚雨集徘徊輒樞號咷弗及神先既幽佇立以泣

任城王誄

昔二號佐文旦夔翼武於休我王魏之元輔將崇懿跡  
等號齊魯如何奄忽命不是與仁者悼沒兼彼殊類矧

我同生能不惜悴目想官墀心存平素彷彿魂神馳情  
陵墓凡夫愛命達者殉名王雖薨徂功著丹青人誰不  
沒德有遺聲乃作誄曰

幼有令德光耀珪璋孝殊閔氏義達參商溫溫其恭爰  
柔克剛心存建業王室是匡矯矯元戎雷動雨徂橫行  
燕代威懾北胡奔虜無竄還戰高柳王率壯士堂為軍  
首宜究長年永保皇家如何奄忽景含之遐同盟飲淚  
百寮咨嗟

大司馬曹休誄

於穆公侯魏之宗室明德繼踵奕世純粹闡弘汎愛仁  
以接物藝以為華體斯亮實年沒弱冠志在雄英高揖  
名師發言有章東夏翕然稱曰龍光貧而無怨孔以為  
難嗟我公侯屢空是安不耽世祿親悅為歡好彼蓬樞  
甘此瓢簞味道忘憂踰憲超顏矯矯公侯不撓其厄呵  
叱三軍躬奮雉戟足蹴白刃手按飛鏑終弭淮南保我

疆場

光祿大夫荀侯誄

如水之清如玉之潔法而不威和而不熱百寮士庶欵  
歔霑纓機女投杼農夫輟耕輪結轍而不轉馬悲鳴而  
倚衡

王仲宣誄

建安二十二年正月二十四日戊申魏故侍中關內侯  
王君卒嗚呼哀哉皇穹神察詰人是恃如何靈祗殲我  
吉士誰謂不痛早世即冥誰謂不傷華繁中零存亡分

流天遂同期朝聞夕沒先民所思何用誄德表之素旗  
何以贈終哀以送之遂作誄曰

猗歟侍中遠祖彌芳公高建業佐武伐商爵同齊魯邦  
嗣絕亡流裔畢萬勲績惟光晉獻賜封於魏之疆天開  
之祚未嘗稱王厥姓斯氏條分葉散世滋芳烈揚聲秦  
漢會遭陽九炎光中矇世祖撥亂爰建時雍三台樹位  
履道是鍾寵爵之加匪惠惟恭自君二祖為光為龍僉  
曰休哉宜翼漢邦或統太尉或掌司空百揆惟叙五典

克從天靜人和皇教遐通伊君顯考奕葉佐時入管機  
密朝政以治出臨朔岱庶績咸熙君以淑懿繼此洪基  
既有令德材技廣宣強記洽聞幽讚微言文若春華思  
若涌泉發言可詠下筆成篇何道不洽何藝不開棊局  
逞巧博奕惟賢皇家不造京室隕顛宰臣專制帝用西  
遷君乃羈旅離此阻艱翕然鳳舉遠竄荆蠻身窮志達  
居鄙行鮮振冠南嶽濯纓清川潛處蓬室不于勢權我  
公奮鉞耀威南楚荆人或違陳戎講武君乃義發笑我

師旅高尚霸功投身帝宇斯言既發謀夫是與是與伊  
何響我明德投戈編郡稽顙漠北我公寔嘉表揚京國  
金龜紫綬以彰勲則勲則伊何勞謙靡已憂世忘家殊  
畧卓峙乃署祭酒與軍行止美無遺策畫無失理我王  
建國百司俊乂君以顯舉秉機省闈戴蟬珥貂朱衣皓  
帶入侍帷幄出擁華蓋榮耀當世芳風掩藹嗟彼東夷  
憑江阻湖騷擾邊境勞我師徒先先戎輅霆駭風徂君  
侍華轂輝耀王塗思榮懷附望彼來威如何不濟運極

命哀寢疾彌留吉往凶歸嗚呼哀哉翩翩孤嗣號慟崩  
摧發軔北魏遠迄南淮經歷山河泣涕如頽哀風興感  
行雲徘徊游魚失浪歸鳥忘棲嗚呼哀哉吾與夫子義  
貫丹青好和琴瑟分過友生庶幾遐年携手同征如何  
奄忽棄我夙零感昔宴會志各高厲予戲夫子金石難  
弊人命靡常吉凶異制此歡之人孰先隕越何寤夫子  
果乃先逝又論死生存亡數度子猶懷疑求之明據儻  
獨有靈游魂泰素我將假翼飄飄高舉超登景雲要子

天路喪軀既臻將及魏京靈輻迴軌白驥悲鳴虛廓無  
見藏影蔽形孰云仲宣不聞其聲延首歎息雨泣交頸  
嗟乎夫子永安幽冥人誰不歿達士徇名生榮死哀亦  
孔之榮嗚呼哀哉

平陽懿公主誄

俯振地紀仰錯天文悲風激興霜焱雪零凋蘭天蕙良  
榦以泯於惟懿主瑛瑤其質協策應期含英秀出岐嶷  
之姿實朗實極在生十旬察人識物儀同聖表聲協音

律驤眉識往俛瞳知來求顏必笑和音則該阿保接手  
侍御充傍常在襁褓不停幃牀專愛一宮取玩聖皇何  
圖奄忽罹天之殃魂神遷移精爽翔翔號之不應聽之  
不聆帝用吁嗟嗚呼哀哉憐爾早沒不逮陰光改封大  
郡惟帝舊疆建土開家邑移蕃王琨珮惟鮮朱紱斯煌  
國號既崇哀爾孤獨配爾君子華宗貴族爵以列侯銀  
艾優渥成禮於宮靈輻交轂生雖異室歿同山嶽爰構  
玄宮玉石交連朱房皓壁皓曜電鮮飾終備衛法生象

存長埏繕修神閨掩扉二樞並降雙魂孰依人誰不歿  
憐爾尚微阿保激推上聖傷悲城闕之詩以日踰歲况  
我愛子神光長滅扃關一闔曷其復晰

蒼舒誄

建安十二年五月甲戌童子曹蒼舒卒乃作誄曰

於惟淑弟懿矣純良誕豐令質荷天之光既哲且仁爰  
柔克剛彼德之容慈我聿行宜逢分祚以永無疆如何  
昊天凋斯俊英嗚呼哀哉惟人之生忽若朝露促促百

年疊疊行暮矧爾既天十三而卒何辜於天景命不遂

哀辭

仲雍哀辭

曹喈字仲雍魏太子之仲子也三月而生五月而亡昔  
后稷之在寒水鬪穀之在楚澤咸依鳥馮虎而無風塵  
之灾今之玄締文茵無寒冰之慘羅幃綺帳暖於翔鳥  
之翼幽房閑宇密於雲夢之野慈母良保仁乎鳥虎之  
情卒不能延期於暮載雖六旬而天殃彼孤蘭之眇眇

亮成幹其畢榮哀綿綿之弱子早背世而潛形且四五  
之末周將願之乎一齡陰雲回於素蓋悲風動其扶輪  
臨埏闔以歎歔淚流射而沾巾

金瓠哀辭

金瓠子之首女雖未能言固已授色知心矣生十九旬  
而夭折乃作此辭辭曰

在襁褓而撫育尚孩笑而未言不終年而夭絕何見罰  
於皇天信吾罪之所招悲弱子之無讐去父母之懷抱


滅微骸於糞土天長地久人生幾時先後無覺從爾有期

行女哀辭

行女生於季秋而終於首夏三年之中二子頻喪伊上帝之降命何短修之難裁或華髮以終年或懷妊而逢灾感前哀之未闋復新殃之重來方朝華而晚敷比辰露而先晞感逝者之不追悵情忽而失度天蓋高而無階懷此恨其誰訴



漢魏六朝百三家集卷二十六



總校官庶吉士臣侍朝

校對官庶吉士臣何思鈞

膳錄監生臣袁文宿